

四庫全書

子部

欽定四庫全書

萬姓統譜卷五十九

明 凌迪知 撰

下平聲

十一尤

宋 劉審瓊

范陽人初為殿直從太祖平澤潞累遷軍器庫使太宗時知澤州有便民之政徙知河陽

年八十餘筋力不衰髭髮鬢黑
孫爽進士及第為秘閣校理

劉載

范陽人父昭下蔡令載博通史傳善屬文後唐進士仕周累官至給事中太宗時知襄州尋以

工部侍郎致仕嘗著五論曰為君為相為將去
讒納諫為士流所稱子二宗言比部郎中宗望

景德二年進士

劉福

下邳人魁岸有膂力以功累官雄州防禦使福至部按行城壘調鎮兵以給繕完出私錢以資宴犒寇雖大至恃以無恐淳化初遷涼州觀察使福雖不學而御下有方略為政簡易人甚德之

劉蟠

渤海人乾祐初進士為益都主簿宋初累官監察御史太宗時歷淮南轉運使遷至左諫議大

夫蟠性清介能攻苦食淡好設竒以售知人主子錯咸平初進士累遷至戶部郎中監鐵副使

劉濤

彭城人後唐舉進士為左補闕累官少詹事宋太祖即位素知濤履行召至闕下以老疾求退

授秘書監致仕子項監察御史項子晟晟子訥譚並進士及第

劉熙古

字義淳寧陵人博通經史旁究陰陽象緯等書五代時擢第仕周為亳州推官入宋累官

叅知政事雖貴顯不改寒素
所著有歷代紀要五十卷

劉廷翰

浚儀人父紹隱死節於晉廷翰自周入宋累立戰功歷官大名尹天雄軍節度使寬厚容

衆長于御下卒贈侍郎子贊元
登州刺史贊明勤州團練使

劉蒙叟

熙古子兄蒙正善騎射累官內藏庫副使後出知滄冀滋三州蒙叟好學善屬文乾德中

進士歷知廬濠滁汝四州以太常少卿致仕所著有五運甲子編年歷子宗弼宗誨皆登進士

劉師道

東明人雍熙中進士累官樞密直學士換左司郎中師道敏于吏事剖煩析滯案無留牘

所至有聲性慷慨尚氣善談世務工
為詩多與楊億輩酬唱當時稱之

劉溫叟

岳子始以父任補四門助教仕後晉為翰林學士宋初拜御史中丞子暉天禧初與魯宗

道同為諫官天聖中為龍圖閣直學士知河南府徙河中

劉孝忠

太原人母病經三年孝忠割股肉斷左乳以食之母病心痛劇又燃火掌中代母受痛母

尋愈及母卒為傭富家得錢以葬富家養為已子後養父兩目失明孝忠紙之復能視太祖親

征太原召見慰諭

劉保勳

河南人父虔讓晉樞密使保勳十許歲播潞州左司馬父卒補供奉官習刑名之學頗工

詩宋初累遷御史中丞知幽州府事會王師不利與其子利涉沒于巨馬河端拱初贈工部尚

書

劉元亨

字子嘉南康人性篤好學開寶中入廬山白鹿洞進修學業及江南廢國學官例選赴闕

時諸生百餘人以學行老宿咸師之後還鄉道過廬陵郡官薦之咸平二年進士第授德平簿

廉明正大政聲四馳民德之

劉用

相州人祖萬進都指揮使父守忠驍衛大將軍用曉音律善騎射初事太宗於晉邸立戰功累

官祁州刺史景德初為邢州副部署真宗北征以守城勞進爵邑歷知齊陳潞等州

劉式

清江人明春秋公毅之學累官三司都磨勘司淳化中持命往諭三韓酋長歸化暨歸值風舟

覆而夷謝表貢珍一無沾濡後官至刑部郎中子立本賜出身立言立德立禮相繼登第俱有

名

劉昌言

南安人少爲學文詞靡麗太平興國中舉進士累官同知樞密院事初趙普留守西京表

爲通判及疾屬以後事昌言盡心太宗嘉其忠于所舉出知荊州府真宗即位就拜工部侍郎

子有方比部員外郎有政虞部員外郎

劉綜

字居正虞鄉人雍熙初舉進士歷水陸轉運使通判大名府起知建安軍時淮南轉運使王嗣

宗兼發運使規畫多迂滯綜因上言請復置都大發運司專幹其職至道初遷太常丞職事修舉多稱薦之者出爲河北轉運使時靈州孤危獻言者或請棄之綜極言其利中國不當輕棄卒從其議兩河兵遣事繁劇轉漕之任尤爲急務綜領其職號爲詳練歷拜樞密直學士知開封府終諫議大夫綜強敏有吏材所至抑豪舉法時稱幹治又多所建白皆切時政云

劉斌

定州人父嘉友為從弟志元所殺斌兄弟皆幼隨母改適人母嘗戒之曰爾等長必復父仇景

德中斌兄弟挾刀伺志元於道刺之不死即詣吏自陳州具獄上請詔志元黜面配隸汝州釋

斌等
罪

劉知信

邢州人父遷晉帳前軍使母即昭憲杜太后之妹知信累官武德使真宗時歷知河南及

昇定州雖因戚里致貴而以循謹著聞卒贈太尉

劉承宗

知信子幼善射兼習書數真宗時累官至定保州在郡有治迹詔書嘉獎官至東上閤門

使弟承渥以蔭補殿直喜為條奏官至閤門祇候

劉筠

大名人少穎悟善文舉進士累官翰林學士承旨出知廬州筠三典貢舉始以策論升降天下

士真宗朝居文翰之選者筠與楊億齊名

劉權

字世畧彭城人大業十一年為南海太守行至鄒陽會羣盜起不得進詔令權討之權率兵詣

賊營說羣賊以利害既至南海甚有異政數歲盜賊羣起權盡力固守以拒之其子審遣人齎

書詣權舉兵權召集寮佐斬其使

劉錯

錯之子初以父蔭為大理評事咸平初擢進士第嘗獻幸太學頌真宗夜觀書得錯頌頗嘉賞

之出以示輔臣且言錯孤幼能自立召試命直史館累遷至戶部郎中鹽鐵副使

劉文質

保塞人父審琦虎牢關使從討李重進戰死文質太宗時累官靈州清遠軍都監真宗時

遷連州刺史再知代州卒文質以簡穆皇后從孫又父死事故前後賜予異諸將

劉德言

安福人南唐時寇亂德言率良家子弟捍閭里全活甚衆宋平江南以所統兵授文階仕

至水部員外郎
江南轉運使

劉謙

唐邑人曾祖直以淳厚聞有盜其衣者既得亦不問謙累官保寧軍節度使守職寡過嘗上言

邊城早寒請六月給冬衣後以為例從真宗東封閱視山門設施有法卒贈侍中

劉若虛

字叔揚侯官人咸平中及第歷大理評事知永嘉縣與晏殊同召試中書遷大理丞改殿

中丞累官屯田員外郎知御武軍卒蔡襄銘其墓若虛有士望鄉黨稱之子奕字象伯天聖中及第歷秘書省校書郎陝西經略招討使以韓琦薦簽判鳳翔府改殿中丞遷屯田員外郎通

判澗州卒

劉倚友

字夢澤處州人舉進士出宰開封咸平間甚有聲靖康初金人犯闕受檄為東壁彈壓官

登城按視為金人所獲脅使降倚友叱罵不絕口死之

劉渙

文質子有才氣遇事敢為天聖中章獻明肅皇后同聽政渙上疏請太后還政不報尋通判磁

州累官工部尚書弟澆沉厚有智畧為水洛城主遷西路都巡檢

劉越

大名人少孤貧有學行舉進士累官秘書丞會禁中火詔勅人所從起越與滕宗諒疏諫仁宗

為罷詔獄又請章獻太后還政太后崩推嘗言還政者越已卒贈左司諫

劉從廣

美之子以外戚少出入禁中待仁宗左右累拜滁州防禦從廣自言待罪行間不能捍禦

驪場坐耗縣官領上所給公使錢上嘉納之从之拜宣州觀察使同勾當三班院請補外自效

以知汝州漳水溢穿隋故渠以殺水勢汝人便
之徙邢州籍鄉軍之罷老者聽引子弟自代著
為令召還復領三班院出真定府路馬步軍副
都總管卒贈昭慶軍節度使謚良惠從廣性謹
飭然喜交士大夫時頗稱之

劉鑄

字季治長興人性素剛鯁淹貫經史幼孤鞠于
伯父比長報以父禮李潛稱為純德士平生交

遊多名流讀書天竺山從學者百餘人母死廬
于墓側孝心篤至有仕族賢之欲妻以女鑄曰
吾寡夫而得仕族女必不肯提甕出汲以修婦
道井曰之責鑄委之耶竟謝却之既沒鄉人追
悼為之流涕著有燕石編傳家

劉琦

字公玉涇縣人博學強記立志峻潔慶厯中進
士通判欽州名為侍御史嘗上疏劾王安石貶

監處州酒稅
後通判鄧州

劉易

忻州人性介烈博學好古喜談兵韓琦知定州上其所著春秋論授太學助教并州州學說書

不能屈志仕進寓居盧氏
習辟穀術越并復薦之

劉顏

字子望彭城人好古學不專章句舉進士知隆興縣免官家居以著書自適學者嘗數十百人

所著有儒術通要經濟樞言石介見其書歎曰恨不在弟子之列

劉湜

彭城人舉進士歷開封府推官遷殿中侍御史累遷龍圖閣直學士知慶州改知密州居官著

能聲

劉平

字士衡祥符人剛直任俠讀書強記舉進士後以將家子改武官累遷廊延路副總管趙元昊

尅延州平往援與賊大戰衆潰平被執而死贈
侍中謚壯武弟兼濟善騎射知兵累官河北緣

邊安撫

副使

劉隨

考城人進士及第通判益州後遷右司諫終天
章閣侍制隨為言官以清直聞在蜀臨事明銳

人號為水晶燈籠比辛帝
憐其家貧賜錢六十萬

劉孟節

壽光人少師種放薦古好學隱于青州之南
治歐冶子鑄劍之地富韓公為菴室以居嘗

賦詩餞之曰先生已歸隱山東人物空范文正
公文潞公皆優禮之欲薦之朝孟節懇辭不就

劉輝

鉛山人嘉祐四年狀元祖母沒解官行喪禮有
諸叔而嫡孫承重者自輝始嘗買田以贍族人

之貧者又結廬以處遠方
從學之士所著有東歸集

劉渙

字凝之高安人志尚高潔精詳史學天聖中進士仕為潁上令以剛直不能事上官棄去家于

廬山歐陽修高其節作廬山高詩以美之渙居廬山三十餘年環堵蕭然饘粥以為食自號西

礪居士

劉沆

字冲之永新人曾祖景洪不從彭玠活萬餘人沆調儻任氣登天聖中進士擢右正言知制誥

陝西用兵沆極言得失執政不悅曰須君作相自行之皇祐中果拜相後罷為工部尚書知應

天府徙陳州卒謚文安子瑾登進士累官天章閣待制歷知瀘虔江福泰五州所至以能稱

劉敞

式從孫慶歷間舉進士累官知制誥奉使契丹還知揚州有惠政徙鄆州道不拾遺累遷翰林

侍讀學士侍英宗講讀每指事據經因以諷諫官至集賢院學士敞學問淵博為文尤瞻敏有

公是集
行世

劉孝誠

富順人性至孝親喪廬墓有芝草之異李見紀其行于學之鴈塔

劉愚

字必明龍游人上舍釋褐居第一調江陵府教諭早晚為諸生講說同僚相率以聽愚與葉適項世安講論不倦以隱居學道為樂愚不樂仕進遂致仕妻徐氏在室時其母將以嫁姑子之富者徐泣曰為富人妻不願也

劉庠

顏之子八歲能詩蔡齊真以子第進士遷太常博士英宗時以災異求直言庠上書論時事除監察御史裏行後以樞密直學士知渭州庠有吏能淹通歷代史王安石稱其博

劉炳

字韜仲贛縣人治平中與弟景繼登進士俱為郎時唐介以言張堯佐貶嶺表炳兄弟餞以詩

逆得罪免官景子敏材為
廣東提點刑獄以廉稱

劉蒙

宜黃人治平初舉進士歷平陽武城霍邱三縣
令淮甸大饑霍邱民賴以全活者甚眾累官至

廣西憲為人清潔不可干以私
所得補官先二弟而後二子

劉昌祚

真定人以父賀戰沒錄為右班殿直元豐中
累官武庫軍節度使卒謚毅肅昌祚氣貌雄

偉最善騎射箭出百步之外夏人得箭
以為神持歸祀之所著有射法數卷

劉航

魏人第進士歷知虞城屏浦縣為政寬猛不同
而兩縣皆治知宿州押伴夏使使者執禮不遜

航折正之持節使夏凡例所遣却弗受還為河
北轉運使熙寧大旱求言航論新政不便者五

不報請祠去起知涇
相二州終太僕寺卿

劉拯

字彥修南寧人神宗時為監察御史蔡京編哲宗黨籍拯歷陳漢唐黨禍京怒出知蘄州張商

英入相召為吏部尚書

劉元振

字君式崇安人滋之子少沉静有器識季父中散大夫當任子將屬元振元振辭與其弟

既弱冠游太學持身有禮衆敬之國子先生呂大臨游酢皆與之友善元豐中士子尚文華元振獨沉涵載籍深造義理以是不合於有司遂歸篤意養親放情泉石卒于家友人翁彥深

銘其墓

劉永

一夏縣人孝友廉謹熙寧初正咸水溢民多弱死永一持竿立門前見他人物流入者輒為

拋出之鄉人負債不肯償立焚其券凡太為醫助教居親喪不飲酒食肉終三年司馬光傳之

以為今士大夫所難

劉庭式

齊州人舉進士通判密州後監太平觀以壽終初庭式約娶鄉人之女及舉進士女以疾

盲且貧甚其家不取復言庭式卒娶及婦死哭之甚哀程顥蘇軾皆嘆以為不可及

劉衍

字成之龍溪人治平間及第授英州推官應材識薰茂科禁言時務諷及新法報罷後知潮陽

縣歲大歉衍發縣帑傾家資運廣米民得不饑改知新州禦妖賊功特授朝奉郎秩滿詣京師會知杭州趙抃同日引見議青苗不合安石叱之曰汝等不讀書故耳抃未能對衍曰三皇五帝所讀者何書安石嘿然力乞致仕累辟不起

劉蒙

字子明渤海人耻為詞賦不舉進士習茂才異等又不欲自售後舉遺逸試第一擢知潮陽縣

不肯行免役法而條上其害印杖
勅去及卒門人誅之曰正思先生

劉潛

定陶人少卓逸有大志好為古文舉進士歷知
蓬萊縣代選過鄆州聞母疾亟歸母死一慟遂

絕其妻哭潛亦死時人傷
之曰子死于孝妻死于義

劉述

字孝叔歸安人舉進士累官為侍御史熙寧初
論新法謫知江州曾孫岑侗儻有大志官至戶

部侍郎

劉誼

字宜翁長興人為江西提舉熙寧中上疏極論
新法不便坐廢黜後隱于茅山子燾元祐間進

士文章典麗尤善書黃庭堅嘗稱之謂羊欣復
生被命修閣帖十卷有遺文五十卷號見南山

集

劉安節

字元承永嘉人天資近道敏于為學師事程伊川以文行推重登元符進士第官至太常

少卿弟安上亦從程氏學登紹興中進士官至中書舍人給事中有文集

劉愿

天水人天資耿介時王安石新書盛行學者靡然向風愿獨不喜穿鑿附會之說潛心伊洛之

學後以八行舉

劉仲武

成紀人資貌雄偉累官東上閣門使知河州吐蕃叛命仲武擊敗之累遷瀘川軍節度使

再帥熙河卒贈少保謚威肅子錫為閣門祗候

劉羲叟

字仲更晉城人歐陽修使河東薦其學術試大理評事累遷著作佐郎終崇文院檢討羲

叟強記多識尤長於星歷術數修唐史時專令修律歷天文五行志著十三代史並劉氏韓歷

春秋災
異諸書

劉紹能

保安軍人以父懷忠與夏寇戰死錄為右班
殿直累遷鄜延路兵馬都監後統軍進討夏

人設疑以間之神宗手詔曰紹能忠勇第一此
必夏人畏忌間之耳紹能捧詔感泣守邊四十

七年大小五十戰
終簡州團練使

劉民先

字聖任其先崇安人五世祖幹當五季之亂
避地入閩遂居崇安之五夫里熙寧初累與

計偕至禮部輒不合慨然曰吾親老矣不可闕
於是屏居潭溪作一枝堂朝夕奉養唯謹後以
持奏釋褐公謂人曰吾豈貪一命者哉顧因是
可榮親耳及母暨夫人年九十果以恩封崇安

縣太君時
以為榮里

劉恕

洪子讀書過目成誦未冠舉進士歷官至秘書丞博學強記篤好史學司馬光修資治通鑑奏請同編修王安石與有舊欲引實三司條例恕不肯附新法固辭且言其失卒年四十七所著

有十國紀年通鑑外紀等書

劉康夫

候官人少從周希孟學熙寧中進士送二十七篇其大皆羽翼詩書根柢仁義

劉芾

永州司禮鞠獄為法家疏駁芾謂今觀疏駁者之設意大與古人用心不同從古惟聞死中求

生不聞生中求死托疾而歸

劉弁

安福人兒時警穎日誦萬餘言元豐初舉進士繼中詞科官知峨眉縣改太學博士元符中進

南郊大禮賦徽宗時改著作佐郎弁為文辭剴別瑕類卓詭不凡所著有龍雲集二

劉鵬

瑞金人元豐間進士為諫議大夫值蔡京用事連疏論之子舉夔靖康初陷于敵死之

劉放

字貢父徽弟博極羣書與兄偕登進士熙寧初知太常禮院初與王安石甚相得安石執政屹不肯附後出知曹州政尚寬平召為國史編修與司馬光同修資治通鑑官至中書舍人有公

非集
行世

劉奉世

敬子天資簡重有法度嘉祐間舉進士元豐中累官僉書樞密院事出知成都府以中丞

邢恕劾再貶徽州團練副使後以端明殿學士知定州尋落職知徐州以舊職致仕

劉彝

字執中懷安人幼介特從胡瑗學善治水第進士為胸山令邨孤寡平賦役抑奸猾凡所以惠

民者無不至邑人紀其事曰治範官終都水丞著七經中義百七十卷明善集居陽集各三

十卷

劉摯

東光人嘉祐中進士為監察御史神宗精勵求治摯請辨君子小人之分又論常平免役法陳

十害司農難詰之摯曰臣侍罪言責今與之爭口舌是辱耳目之任矣官至僕射兼中書侍郎

出知鄆州

卒謚忠肅

劉崧

字伯高崧字仲高崧字季高吳興人東坡先生所賦吳興丈人之詩劉存叔諸孫也三公才學

官位士夫例能稱之汪彥章嘗銘仲高之墓仲高任福建提刑日書武夷山三大字甚奇今石

存刻尚

劉季孫

字景文世家開封以卹典得官少篤學能詩文東坡先生守錢塘喜其入上章薦其練達

武經講習造
政知隰州

劉顛

為御史以言事貶坡詩云烏府先生鐵作
肝風霜捲地不知寒世因目為鐵肝御史

劉凝之

與陳舜俞養犢為騎牛俞作騎牛歌李伯時
畫騎牛圖山谷拜其像賦詩云去官清潁尾

買田落受灣身仕菰蒲中名滿天地問誰能四
十年保此清靜退性來問谷中神光射牛背年
八十餘卒官至
屯田員外郎

劉燾

字無言宋劉誼次子未冠遊太學與陳伯亨稱
為八俊元祐三年蘇軾知貢舉稱其文章典麗

必巖谷間苦學者遂中甲科尤善書筆勢道勁
黃庭堅曰江左又生一羊欣矣在館中召修閣
帖十卷有遺文五
十卷號見南山集

劉絢

常山人力學不倦明于春秋元祐初韓維薦為京兆府教授王巖叟又薦為太學博士皆不就

程顥每為人言他人之學敏則有矣未易保也若絢我無及焉

劉安世

字器之航子登進士第不就選從司馬光學問盡心行己之要光教之以誠且令自不妄

語始調沼州法司歷臺諫論事剛直一時敬憚目之曰殿上虎哲宗末坐黨安置其梅等州徽宗即位移內郡安世儀狀魁碩音吐如鐘忠孝正直居家未嘗有惰容嘗曰吾欲為元祐全人

見司馬光于地下也

劉安上

字元禮生有淑質端重嗜學與從兄安節俱以學行為鄉里所推聯薦于鄉同遊太學一

時賢士大夫慕與之交號二劉並登紹聖四年進士第除太學博士大觀元年提舉兩浙學事

陞辭進對上顧近臣稱其醜藉有大臣體即日
除監察御史朝廷有推鞠多以屬安上持法尤
審而根於誠恕多所平反十一月遷殿中侍御
史屬蔡京擅政安上抗章極言其罪數十條未
報三年六月又與中丞石公弼率同列廷劾之
京以太一宮使罷相遂致仕八月安上遷右諫
議大夫知婺州奏減六尚衣造花羅數仍乞不
為後例市田以給浮橋民列石紀之宣和元年
致仕官至朝請大夫贈通
議大夫文安縣開國男

劉毅

字剛中元祐初進士調吉水尉再調豐城縣政
聲藉甚知南豐縣縣有稅官恣橫陰養無賴以
為爪牙商旅阻不行市民胥怨毅白于郡稅官
怒因集惡少三十餘人剋期劫甲伏庫欲逞宿
憤或泄其謀毅遂密伏弩徒于利舍至期果大
誅斬闕而入遇伏兵皆驚愕束手就擒邑人大

駭毅即撫慰然後列其事于郡
轉承議郎知龍泉縣未赴而卒

劉勃

眉山人元符初詔求直言九上書言宣仁太后
之誣虐司馬光之枉乞用范純仁蘇轍之賢斥

章惇蔡卞呂惠卿蔡京之奸改提
舉湖北路常平尋坐元祐黨籍

劉棠

字君美龍溪人元祐中進士歷樞密院編修出
為利州路提舉學事後提舉兩浙常平以朝請

即致仕同邑有陳補者與棠俱有詞賦聲時稱
之曰劉棠陳補漳巖賦虎棠既登第補遂隱居
不仕

劉位

招信人知滁州節制徐泗二州軍事金人入寇
位屢敗之金遣使誘之後出戰中流矢沒于陣

贈建寧軍節度使
建廟滁陽號剛烈

劉寧止

字無虞歸安人舉宣和進士知秀州論疏多剴切所著有忠堂教類彙

劉鞬

字仲文一字潛文崇安人民先之子有智謀善兵從兄鞞平睦寇有功補承信郎再從守真定通敵圍城鞞命鞬以強弩射之敵知不可犯退去轉修武郎又隨鞞宣撫河北膽氣蕪人無少

怯以疾卒于家

劉珏

長興人崇寧間登第累官中書舍人陳十開端之戒遷吏部尚書建炎中同知三省樞密院事奉行追復元祐黨人故官及錄用子孫未盡者所著有吳興集及集議若干卷

劉紹先

靖康初京城失守紹先以兵數千屯光州故是時郡多破而先得獨全

劉滄

渭州瓦亭寨監押權靜邊寨擊破党留等族時任福敗遣城晝閉居民畜產多被掠滄獨開門

納之遣人呼
為劉開門

劉延慶

保安軍人雄豪有勇嘗從西伐屢立戰功累遷泰寧軍留後徽宗時破夏人有功拜信都

軍節
度使

劉正夫

字德初西安人未冠入太學有聲與范致虛吳材江嶼號四俊仕為左司諫徽宗方究蔡

即獄正夫入對徐引淮南斗粟尺帛之謠上意遂解謂正夫曰兄弟之間人所難言卿能及此必為公輔後果致位兩府封康國公

劉晏

嚴州人入遼舉進士為尚書郎宣和中率眾數百來歸授通直郎金人犯京師以晏總遼東兵號赤心隊建炎初從劉正彥擊淮西賊及金人犯建康社充兵潰羣寇犯常山晏出奇破之後

追擊賊戚方于宣城為賊所害贈
龍圖閣待制官其四子立廟死所

劉達夫

字宣子洪之子也元豐中入太學以父年老
每歲一歸省因留侍焉父卒遂無仕進意隱

居北山凡數十年崇寧中詔舉遺逸州縣以達
夫應詔授松江簿大觀中添差温州教授後毛
友薦于朝召見將任以中都官辭
曰仕非志也遂遷越州教授卒

劉宥

知天水縣後致仕而金騎犯天水木門掠宥行
素視其誥命曰隨我去官北朝宥罵曰我為南

朝鬼不為北
朝官隨遇害

劉羲仲

字壯興恕子長于史學平居厲節操有祖父
遺風後以蔡京薦召為修史檢討至京師時

宰以下並不造謁忤京不復任卒于廬山所著
有大初歷弟和仲有超軼材作詩清與剌厲欲

自成家為文慕石
介有俠氣亦蚤死

劉思尹

字堯咨一字元衡新昌人少力學詣闕獻書
陳古今理亂得失足國裕民養才取士選將

練兵制勝之策不報初投長沙司戶叅軍丹授
江陵府察推廉潔無取自號戒得翁直忤上司

棄官歸詩酒自娛幾二十年
稱玉坡老人官至朝奉郎

劉顯

吉水人舉進士為光祿主簿時曾布當國顯于
布為甥婿未嘗間見布貶顯得免後為夔路提

舉常平子琮登第任諸王宮翊善靖康中京城
受圍敵議立張邦昌琮不預有文集數十卷

劉安世

字平叔安福人舉進士嘗知雩都縣有郡官
諷以獻羨餘者安世曰上膺賦重安得有羨

餘遂不仕歸而設教遠近願受業者踵至楊萬
里從而師之安世沒萬里為制服及塋門人私

謚清純
先生

劉達

字公蘊隨縣人舉進士高第累官至中書侍郎
蔡京以彗星見去相達首勸徽宗辟元祐黨碑
寬上書邪籍之禁稍正京悖正害民之政及京
復相謫鎮江軍節度副使安州居住後京再罷
稍起知杭州加
資政殿學士

劉詵

福清人舉進士崇寧中歷官宗正鴻臚衛尉太
常少卿纂績因草禮詵通音律居母之喪盡禮
有芝產

墓側

劉夔

字道元崇安人第進士歷知陝廣潭州所著有
庶名累官樞密直學士知鄆州發廩賑饑民賴

全活盜賊屏息後知建
州以戶部侍郎致仕

劉幹

字仲偃崇安人其先自京兆徙闕子孫仕宋得謚忠者五人世號五忠劉氏幹第進士歷知建

福州累官延康殿學士宣和中再知真定金人犯京師遣幹使金營金人欲留用幹曰偷生以

事二姓死不為也又聞軍中欲立異姓乃仰天大呼曰有是乎遂更衣酌卮酒自縊建炎初贈

資政殿大學士後謚曰忠顯

劉士英

字冲發武康人以上舍擢第為温州教授方臘寇擾士大夫皆遁去士英獨留推郡諸生

石礪為謀主聚兵禦守民賴以全後通判太原金人大入與將官王稟堅守城中食盡士英死

之時年四十五門人謚為安節先生

劉寧

字無虞歸安人舉宣和進士知秀州論疏多剴切所著有教忠堂類案

劉滂

字德霖武義人大觀進士蔡京與滂祖為布衣交滂至京師京欲挽滂為黨滂曰此胡為及我

哉京聞之不悅滂亦拂衣而去

劉翊

靖康初為真定路都鈐轄金人來攻翊率眾晝夜搏戰城陷猶巷戰知不敵顧其弟曰我大將

也可受其戮乎挺身之孫氏山亭中自縊死

劉韞

字仲固忠顯公鞞弟也以門蔭入仕歷倅三州典二郡皆有政聲後以朝散大夫致仕築室于

縣南有亭臺花木之勝日夕諷詠自號秀峯與屏山晦菴諸名賢多酬唱嘗以杜少陵喜無多

屋宇幸不礙雲山之句分韻賦詩人尤傳誦

劉正

字道醇候官人建炎間知尤溪縣廉明不阿紹興初建劍寇起正訓練民兵以衛縣境弓手余

招醜酒躍馬入隊擾其眾隊長不能止正斬以
徇部下肅然未發鄉民林悌鄭侑招集亡命欲
為亂正兼得其情執
而戮之民賴以安

劉汝舟

字元造毅子政和中第進士調興化軍司法
郡有富民王氏死而無嗣人以戶絕告委驗

實得資二十萬其妻以遺腹自訐守欲籍其業
汝舟執不可既而生男又為辨折守怒汝舟納
告命乞歸守怒雖稍霽尚籍其半王氏子名濟
紹興中登第先是汝舟與張浚有故建元初獻
浚平戎十策浚
辟為參謀官

劉學裘

字傳之珙之仲子初珙沒無子以學雅學裘
為後學裘用父蔭補承奉郎多歷州縣一以

循良為治吏民皆化之嘗守撫州修復學校刻
規約于堂以示學者時一至為解說義理之學

移守邕州秩滿召還後以疾
累得郡不赴終中散大夫

劉侯

字碩翁象山人總角日誦千言為文操筆立成
登紹興三十年進士倅紹興府帥使朱熹雅敬

之委以諸暨蕭山荒政活民十萬改知岳州東
宮引見言事光宗見其儀容整肅音吐明暢注
目首肯悉為報可至郡覈四邑常賦外免其板
帳鑿空者其目凡八歲減一萬一千有奇奏定
為令除直秘閣召直尚書禮部郎
中卒所至有遺愛民立生祠祀之

劉允升

名階以字行允升建州布衣也聞岳武穆被
逮詣闕上書訟其冤秦檜大怒下棘寺論死

劉霖

昌州永川人後居瀘州宋瀘州安撫使海應春
殺判官李丁孫推官唐奎瑞以城叛降元霖詣

合州張珏計復瀘珏初未許霖願以身質珏乃
決軍行至城下夜四鼓先遣人梯城斬闕舉入

城巷戰殺應春遂復瀘州珏
以霖知南平軍卒死於兵

劉長孺

耀州人為簽書博州判官廳公事劉豫得號
長孺以書諭以禍福豫怒囚之百日終不屈

劉一止

字行甫述族孫宣和間登第為秘書郎遷給
事中封駁不避權貴紹興中以敷文閣直學
士致仕有類豪五十卷從弟寧止亦中第官至
吏部侍郎進徽猷閣學士知秀州論疏多剴切

有教忠堂
類豪十卷

劉岑

吳興人遷居溧陽博學愛士有古君子風登
進士第累官戶部侍郎以徽猷閣侍制致仕

劉寶

岳飛將嘗從破楊么有功及飛遇
害寶遂散其部曲隱居華容山卒

劉惟輔

涇州人為熙河馬步軍副總管金人陷秦州
惟輔迎戰殺傷大當又刺殺其將黑鋒敵為

奪氣金人略熙河惟輔出焚積粟匿山寺中為金人所執誘之不言遇害張浚承制贈昭化軍

節度使官其子孫十二人

劉錡

字信叔武第九子也徙順德軍美儀狀善射聲如洪鐘宣和間授閣門祇候高宗即位差知

岷州紹興中召還為江東路副總管金人圍順昌錡大敗之以計令終夜自戰積屍盈野後烏珠自來錡又大敗之死者數萬累官至太尉帥荆南府卒謚武穆

劉之望

合江人紹興中進士宰相沈該薦以無塵埃氣召除學官遷秘書省正字所著有觀堂集

劉光世

字平叔延慶子以討河北賊有功拜鎮海軍節度使後從高宗南渡累立戰功封楊國公

卒謚武僖後追封廊王

劉章

字文孺龍游人少警異日誦數千言紹興中廷試第一居館職秦檜惡其不附已諷言者劾出

之檜死召還累官禮部尚書兼給事中章容貌魁碩以周密自守出入兩朝被顧遇未嘗泄禁

中一語以資政殿學士致仕卒謚靖文

劉穎

字公實西安人紹興末進士調溧陽主簿張浚知其賢遣子栻與游講明理學穎嘗言士以不

辱身為重在從班日韓侂胄舊與歡好及侂胄用事穎謝絕之累遷刑部侍郎以竇謨閣直學

士致仕

劉元瑜

知潭州徭人數為寇元瑜使州人楊謂入海山說酋長四百餘人出聽命因厚犒之籍以

為民几千二百戶

劉德秀

豐城人舉進士歷官諫議大夫吏部尚書進龍圖閣學士四川制置使改知潭州召簽樞

密院進爵郡公為政嚴而不苛帥蜀尤有去思自號退軒有遺橐數十卷

劉安雅

紹興間知梅州會虔賊陳榮等圍城安雅命取鈞吻草研汁投酒中散於民居賊遣人齎

牒索金銀遂磔之盜入民居縱飲死者百數賊疑懼遁去圍遂解

劉才邵

字美中廬陵人鷄之後紹興中累官中書舍人兼權直學士院高宗稱其文出知漳州開

渠溉田民甚德之召拜工部侍郎權吏部尚書才邵氣和貌恭方權臣用事日雍和遜避以保

名節所著有
樾溪居士集

劉克遜

字無兢克莊弟也以父任補官調古田令以救荒捕盜著勞績辟江西帥幹秤提令行奴

有告主害錐者克避曰不可以訓累遷知邵武軍威愛並行除劇盜興教化改潮州初銀價平每丁賦錢五百後銀貴加至四倍下教蠲之曰縱得罪無恨移泉州以疾奉祠克避一生清貧尤工於詩葉適趙汝談稱之弟克剛為泉州錄叅真德秀薦知沙縣後知惠州清儉治辦修弊起廢卒

于官

劉彌邵

字壽翁夙之子夙方盛年歿家貧有書數厨彌邵慨念先澤卧起其間不為舉子業惟以

學古為心自六經以下莫不抄纂考論古今斷制義理一以洙泗闢洛之語為法事必求通理欲實踐自童至老確然不移少以貧食於學後棄去郡博士俞來致學俸卻不受郡守楊棟創尊德堂於學宮以處之亦不久留及棟提點福建刑獄復論薦于朝未報卒年八十二

劉成

由科第知古田縣遇裡需例授山成京秩詰已下憚不敢白山成性狷介嘗質經於陳寔評史

於鄭寅問易於蔡淵自是之外罕與人接臨卒猶為諸孫講張棧集解孟子一章所著有易崇

漢考等書
藏于家

劉洵直

字子浩年十二父亡十六失母時已知苦學篝燈几筵之旁號慟即誦書率至夜分嘗一

夕族父聞哭聲甚哀問故曰讀馬周傳至其言少失父母犬馬之養無所施為之悲感不能自

止諸父奇之兩以鄉舉試禮部為第七人登紹興二十一年第調永巷縣主簿秩滿授漳州教

授終通判平江府年五十七贈金紫光祿大夫子槩棠皆登進士第

劉清之

字子澄臨江人受業兄靖之博極書傳紹興末舉進士及見朱熹慨然志義理之學嘗為

高安縣丞賑濟有方徙知宜黃縣孝宗時召對首論民困兵驕累官知衛州善政甚多罷主雲

臺觀光宗即位起知袁州所著有訓蒙新書通錄墨莊祭儀時令諸書

劉子羽

字彥修韜長子建炎初為樞密院檢詳文字與張浚同謀誅范瓊及浚宣撫川陝為叅議

軍事薦吳玠吳玠中興戰功居多子羽之力也後知鎮江府兼沿江安撫使

劉子翬

字彥冲韜次子痛憤父死廬墓三年執喪致羸疾服除授通判興化軍以不堪吏事辭歸

武夷山妻死不再娶事母兄盡孝友講學不倦學者多從之游號屏山先生

劉子翼

字彥禮韜之季子也以用蔭補官時宣和中韜守真定女真入寇韜遣子翼入奏戰守事

宜累遷浙東提舉茶鹽事改廣東轉運判官奉祠俄以循吏薦知撫州徙信州子翼開明勤決

而本之以恕所至簡
易不擾民甚愛之

劉珙

字共父子羽長子生有奇質從季父子輩學時
刻苦自勵登進士乙科紹興末為中書舍人兼

直學士院金人渝盟一時詔檄皆出其手臨數
鎮民愛之如父母後同知樞密院事果精明斷

時近習用事力裁
抑之卒謚忠肅

劉勉之

字致中崇安人自幼強學日誦數千言以鄉
舉詣太學時禁伊洛學勉之潛抄日誦師事

譙定楊時歸結艸堂讀書力耕自給紹興間召
至與秦檜不合即謝病歸學者號白水先生

劉誨

建炎中金烏珠軍至杭州守臣康允之棄城退
保赭山時誨自楚州赴召在城中軍民推之為

守後死于難
贈直龍圖閣

劉季裴

字少度福安人十歲能文紹興中進士歷秘書丞監察御史起居郎兼太子左庶子終朝

散郎秘閣修撰季裴乾道間作子論以進中一篇論何承天屯田田矩畫甚詳上方欲行兩淮屯

田事大見稱賞每經筵顧問所對皆稱旨所著有論孟周易解頤齋遺藁

劉汲

字直夫紹興進士除武信軍推官後謫蓬州稅欽宗召赴闕汲奏願得驅馳外服治兵食以衛

京師金人攻之益急矢下如雨軍中請汲去汲不許曰使謫知安撫使在此為國致死敵大至

汲死之

劉度

字汝一博聞強記內翰汪藻一見異之以制科薦登紹興己丑進士歷官臺諫辛己歲敵人敗

盟條陳三策大駕巡邊留居諫省上即位抗疏陳春秋正始之道有傳言鑑古五十篇雜文三

卷十

劉龜年

字且老孝宗時知武陵寬嚴有則境內冒耕蕪田究正之息訟均賦定版籍錢淫祠罪其

倡首者部使者聞於朝龜年秩滿造朝竟不謁政府而歸遷通判沅州

劉如愚

字明遠崇安人有才幹善屬文尤喜吟咏居鄉日與朱文公唱酬從子珙與同登第調秀

州海鹽尉獲海賊改秩知福州古田縣秩滿倅德慶權新州尋除行在審計院終江西帥司叅

官議

劉翔

字圖南浦城人通諸經尤注意于易以累舉得官調蘄春尉因上其所著易卦辭有旨看詳監

學以通經旨聞授福州教授蒞任初謂教官實風化所係要當上不負天子次不負州郡下不

負子弟入學之意在官軒輊抑揚盡合公論再任潭州教授多士歸心卒于官有經進易解十

卷翰林洪

邁為之序

劉珥

字平父崇安人子暈之子仕為從事郎自號七省翁每與朱文公諸名賢倡和有詩集一十卷

劉大中

字立道真州人紹興七年自兵部尚書知處州在任激濁揚清抑強扶弱所部肅然初民

輸秋租監官恣下漁取大中令輸戶自解吏不能為擾未幾召還除吏部尚書尋再知處州乞

祠提舉臨

安洞霄宮

劉砥

字履之世南子六歲日誦千言至覽忠孝大節輒激發感慨十歲通九經傳記能綴詞賦宋乾

道間與弟礪俱中童子科嘗讀釋老書曰此不足習乃治舉子業又曰此不宜專習因徧取伊

洛諸儒書讀之有見率其弟礪登朱文公之門
文公嘉其篤志敏學受先天太極圖傳充然有
得文公晚修禮書礪預編次以時方攻道學遂
無復任迹意與蔡元定黃榦相友善二公嘗往
來其家因顏其讀書之室曰龍峯巖年四十
五卒所編有王朝禮論語孟子解皆未脫橐

劉礪

字用之礪之弟幼穎悟孝弟登童子科後受學
于朱文公文公嘗曰履之兄弟却差勝若更加

功或可望耳與黃榦最友善及禁偽學志尚愈
篤蔡元定編置道州礪與其兄醜臚甚厚年四

十七卒

劉子玠

字君錫礪之子父卒乃生鞠子外家六歲哭
其叔父如成人既長從黃榦學非名士不交

非義理之書不存嘗類列先賢矩範參之己意
以教戒其子侄曰行好事做好人足矣僥求名

利非吾志也平居退焉若無及其見義必為不類流俗則有人之所難能者嘗避田數百畝與

諸子侄以成母志年四十八卒

劉玠

潭州將官建炎中金人陷潭州玠挺身血戰中數十天死於陣民為立廟張栻作記

劉夙

字賓之莆田人紹興辛未南省第一人孝宗朝名試館職極論薦舉之弊皆由大臣為惠而不

為政所致除著作佐郎上封事曰陛下與曾觀龍大淵鞏觴咏唱酌字而不名罷宰相易大將

待其言而後決裁草僥倖當自宮掖近侍始請外除湖北帥參起知衢州奉劄論紓民力罷貢

獻辨君子小人曾觀道衢謁夙不納徙知温州尋奉祠卒

劉朔

字復之夙之弟紹興庚辰南省第一人孝宗初立召對曰陛下何不延納憤激敢言之士而聽

許直難堪之言因以自考察成敗得失且及曾
覲龍大淵罪狀出知福清縣尋奉祠再召入對
時虞允文方贊恢復朔言宜選兵蓄財以待其
變免試除正字出為福建帥叅道卒子起晦字
建翁登第歷貴溪令召為秘書省正字
蔚有時望識者謂其材行不忝其父云

劉允迪

玉山人隆興初進士知德安縣為政一本于
儒術以惠愛得民後居家建義學以教族子
弟及鄉人之願學者累官至朝
奉郎叅議沿海制置使軍事

劉興祖

字孝先大庾人習易春秋旁通聲律登乾道
五年鄭僑榜進士第以春秋授藍廷堅中丙

科初調韶之錄叅因感陽膚為士師
之言遂五仕為冷官以通直郎致仕

劉迂

宜黃人隱居不仕文章敏贍自成一家諸子百
家皆精究迨朱陸諸儒會鵞湖嘗以詩請益于

理學有所得年八十餘無疾沐浴焚香而卒有文集

劉燭

字晦伯建陽人與弟炳受學朱熹呂祖謙乾道中進士累官工部尚書兼左諭德嘗上疏言敵

運已衰我之邊鄙當過慮者三又表章朱熹四書以備勸講卒謚文簡所著有奏議史彙講堂

故事雲莊外彙等書

劉克莊

字潛夫夙弟朔之孫父彌正淳熙中進士累官起居舍人克莊生有異質日誦萬言為文

拔筆立就為龍圖閣直學士真德秀以學賈古今文追騷雅薦之所著有後村文彙

劉銓

字全之樂清人進士隆慶中知海鹽大水害稼被檄檢傷放秋苗數萬斛貧不能輸者請于朝

得停閣勸富人發廩賑饑民無畊資貸于郡給之學舍久廢徹圭租二百斛倡修之政務循良

飭以儒術
恥于求名

劉剛中

字德言光澤人自少慷慨讀老莊荀揚之書詞義有契輒為之贊後登朱熹門熹首問讀

何書如何用功剛中以所業對熹曰此非乃所學也剛中遂專聽熹言熹為易其字曰近仁與黃榦友善切磋之益居多既歸築室講學號曰琴軒從學者甚眾嘉定四年第進士調漢陽簿轉蘭溪丞所著有師友問答集西溪奇語若干卷

劉炎

字潛夫邵武人游朱熹之門熹卒祭以文有云凜然若街馭之甚嚴泰然若方行之無畔盖久

而後得之何又止流行乎四時而昭示乎河漢

劉彌正

字建翁夙之子淳熙中第進士嘉泰末入為諸司糧料院時韓侂胄為相兵禍有萌召使

議錢實欲付以邊事彌正行兩淮久而後歸言無故而先發天理不順無預而輕舉人謀不從嘉定初為考功郎即定朱熹謚曰文終吏部侍郎

劉褒

字伯寵十歲能屬文登淳熙五年進士第居官有聲除司門郎中才高見忌不獲久仕于朝洎

歸郎于小漿題一絕云去日紅蠶吐素絲歸來寒橘剝金衣沙鷗不入鴛鴦侶依舊滄浪繞釣磯又賦歸隱詩云泉石膏肅不得半巖明月夜猿啼皆佳句也自號梅山老人有梅山詩集藏于塾官至朝請郎知西全州

劉甲

字師文摯之裔徙居龍游淳熙中進士累官國史院編修使金伴宴完顏者名犯仁宗諱甲力辭顏完更名修歷知興元府金立吳曦為蜀王甲上書告變上覽之稱忠臣者再後拜寶謨閣

學士甲嘗謂吾無他長惟足履實地畫所為夜必書之名曰自鑒為文平淡有奏議十卷卒謚

清惠

劉屋

字伯醇煥之子建陽人號靜齋補承務郎知江寧縣辟制置司幕官以收李全功轉朝請大夫知常州衛州移南劍州以疾不赴與學徒熊竹谷輩講道終其身

劉應李

字希泌炳之孫建陽人初名榮登咸淳甲戌進士調建陽主簿入元不仕退與熊禾胡廷芳講道於淇源山所居十有二年後建化龍書院於苔潭聚徒講授學者雲集

劉光祖

陽安人登進士第為潼川提刑司檢法淳熙初召對論恢復事光宗時為殿中侍御史極論道學所係嘗謬涪州學記諫官指為謗訕奪職謫居房州終顯謨閣直學士奉祠卒謚文節

所著有
後漢集

劉焯

眉州人贊讀恭王邸權尚書禮部侍郎光宗以太子尹臨安焯為判官兼少尹天府之政不便

于諸貴出為湖北轉運判官知靜江府平李接之亂

劉宰

字平國金壇人紹熙進士歷任州縣有能聲理宗以為籍田令及遷太常丞知寧國府皆不就

瑞平間一時譽望收召略盡所不能致者宰與崔與之耳隱處三十年于書無所不讀所著有漫塘集既卒朝廷嘉其節謚文清

劉松年

錢塘人居清波門紹熙間待詔畫院師郭禮工畫人物山水神氣精神名過於師寧宗朝

進明織圖稱旨賜金帶院人中絕品也

劉學箕

字習文，理之子。恬于仕進，年未五十即南山下居焉。扁曰方是閣堂，若將終身為文高。

真閒雅，得其家傳。劉淮稱其詩摩香山之壘，詞拍稼軒之肩。至若松江峭遍，直欲與坡仙爭耐。

人以為知言

劉漢弼

字正甫，上虞人。嘉定中進士，知嘉興府。累官侍御史，兼侍講。以戶部侍郎致仕。漢弼學明。

義利之辨為正字時，應詔言事極論致災。彌災之道，其他建明甚多。卒謚曰忠。

劉厚南

字子開，慈谿人。嘉定初進士，為國子博士。嘗應求言，詔上疏略曰：副求言之詔者，當伸敢。

言之氣宏，受言之規者當盡用言之實。帝嘉納之。

劉泌

餘千人。嘉泰間舉進士，歷官郡縣臺省院部。後拜參知政事。二年攝相事八十日，以母老乞致。

養上從之泌自幼以孝著嘗
為母祈壽甘露三降庭梅

劉伯正

餘千人開禧初舉進士累官監察御史有事
明堂雷電忽至執事者多離次伯正儼立殿

下聲色不動遷左司諫三上章疏淳祐間拜叅
知政事卒贈少保時論謂其立朝以靜重鎮浮

不求名
譽云

劉希仁

字居厚莆田人嘉定四年舉進士歷安吉令
通判臨安府提轄文思院引對獻言皆涉貴

近時論壯之以司封郎中知泉州改淮東運判
除直秘閣令起引奏事以臺疏罷奉祠除將作

監希仁屢以謗退官止中大夫生平每遇
遭罹必有論建雖屏居猶上箴缺失焉

劉傳漢

咸淳間知南康軍首行淳熙荒政捐已俸以
賑貧節用買田置惠民倉撥廢寺田穀助星

子月解軍糧創白鹿洞貢士庄修流
浙橋愛民重士興利補弊善政為多

劉應龍

字漢臣高安人嘉熙中進士歷官戶部侍郎
廣東安撫以討賊功進封開國男入為寶章

閣學士兵部尚書
辭歸九峯號實齋

劉元高

字仲山應龍長子幼有異質一目十行既長
每與姚勉胡仲雲論天下事輒慷慨激烈時

號高安三俊後登淳祐進士第歷官至御史所
著有漢史意抄書史續抄貴華錄三劉家集山

居
橐

劉子薦

安福人父天驥以進士知澧州没于王事子
薦度宗時知融州以廉靜著聞廣西經司檄

為叅議官德祐初元兵至靜江子薦提兵守城
取笏書其上云我頭可斷膝不可屈城陷竟死

之

劉士昭

秦和人與鄉人同謀復秦和敗血指書帛云生為宋民死為宋鬼赤心報國一死而已因

以其帛自經死其黨入獄多乞憐苟免有王士敏者獨慷慨不撓臨刑嘆曰恨吾病失聲不能

大罵
耳

劉沐

廬陵人文天祥開府南劍沐收部曲會之授太府寺簿專將一軍為督府親衛空坑兵敗被執

與其長子仲子皆死季子復從天祥死嶺南當時江西忠義皆沐所號召云

劉友益

永新人宋亡卜築萬山間杜門讀書不與世接著通鑒綱目書法五十卷研精覃思歷三

十年而後成元揭傒斯稱之曰百世之下先生此心先生不作山高水深

劉辰翁

字會孟廬陵人少舉進士宋季亂遂隱居求道所著有須溪文集子尚友能繼其學元吳

徵評其父子之文謂辰翁奇詭變化尚友浩瀚演述皆能成一家之言云

劉蛻

荆南人時荆南歲解舉人多不成名蛻始及第號為破天荒

劉鼎孫

江陵人第進士累官翰林學士德祐末從二王至崖山陸秀夫負王赴海死鼎孫亦驅家

屬并輜重沉海不死為元兵所執榜掠無完膚一夕得脫卒蹈海死

劉銳

理宗時為文州太守趙汝鼎為通判相誓死守更迭出戰被圍旬有五日汲道絕兵民水不入

口者半月至吮妻子之血卒無叛志城垂陷汝鼎猶提雙刃入陣中十六矢被執以死銳先殺

其妻父子三人登文王臺自刎事聞立廟

劉師勇

度宗時以戰功歷環衛官魯港師潰從二王至海上見時事不可為憂憤縱酒卒葬于鼓

山

劉井

字清叔寧化人事繼母以孝稱端平二年進士調會昌尉當醜寇往來之衝嘗勒弓手中警寇

不敢犯嘉熙間漕帥王堃差臨川和糶時朝廷降現錢充糶本他官皆易以楮井獨戒吏無得

效尤遂先辨憲司論擅易糶本錢事黜者數人并易見知辟大庾令會譚如海嘯聚憲司檄督

捕遂擒之後調辰州判官江西憲辟知瑞金築城建學能名益著以平洞寇功就任改京秩終

奉議
郎

劉準

鄞人自幼好學長而有成當宋末知國事日非隱居教授絕仕進意卜葉青山之原日以教子

讀書為事學者稱為南窓先生子汝舟字端父
確守父訓平居無戲言情容郡之名士大夫相

繼來居一時林
下衣冠為盛

劉黻

字聿伯樂清人以太學上書言朝廷進退大臣
嘗以禮忤執政送南安軍安置既還復極言政

治得失官至吏部尚書二王泛海陳宜中
迎黻共政至羅浮以疾卒所著有蒙川集

劉揚祖


字弘宗慈谿人幼有志操穎悟絕人崇伊洛
正學景定三年登進士第除江州教授學政

修舉推為崇文院校書郎時賈似道執政內外
爭附揚祖獨捉然無忌言事忤旨斥監沅東稅

臺官交薦之起授通直郎牽南劍之將樂建言
時政利病賈相不悅再斥之改守吉州福建提

點刑獄遭刑部員外郎入朝益勵志節遇事敢
言賈相崇建臺榭廣求珍玩揚祖又持疏謂朝

廷不當忘經國大務坐待其弊賈又欲斥之自
後國事日蹙嘆曰人臣當與國同存亡今大事
已去不可為矣遂有肥遯山林之志逾年而宋
亡改冠帶哀慟及元下詔求賢揚祖不忍聞遂
徙家雲湖山墾田給食自號
介白散人以示不臣於元



萬姓統譜卷五十九

欽定四庫全書

子部

萬姓統譜卷

六十三
六十三

詳校官中書臣徐志晉

主事臣祁韻士覆勘

總校官知縣臣楊懋珩

校對官中書臣李 棻

膠錄監生臣李文杞

欽定四庫全書

萬姓統譜卷六十

明 凌迪知 撰

下平聲

十一尤

遼劉伸

宛平人少以詞翰聞登進士累官大理卿明法而恕人以不寬一日奏獄速主與近臣語不顧

伸進曰自古帝王重民命願省

臣奏道宗驚異後拜參知政事

劉景

河間人好學能文積官翰林學士景宗知其忠實可倚用乃書其笏曰劉景可為宰相後以節

度使無待中致仕子慎行為北府宰相時帝多即宴飲行賞罰慎行諫止之

劉仲誨

宛平人父彥宗累官平章事仲誨官至太子少師兼御史中丞立朝峻整容色莊重世宗

嘗曰朕見劉仲誨常若將切諫者其以剛嚴見重如此

劉炳

葛城人性倜儻有氣節每讀書遇古忠臣烈士輒嘆息景慕恨不與之同時貞祐三年第進士

即日十策大要任諸王結人心廣儲人材擇賢守令褒忠義務農桑崇節儉去冗食修軍政

繕城池章上宣宗嘉納之擢補御史臺令史

劉秉德

容城人性安靜恬退與物無競貞祐間避地豫之許封山以教授為業興定二年第進士

累官至鄭州防禦判甚有能聲

劉政

洛州人性篤孝母老喪明政每以舌舐之逾旬母能視物母疾到股肉啖之及母死負土起墳

葬之日飛鳥哀鳴翔集邱木間廬墓
三年防禦使以聞除太子掌飲丞

劉守真

河間人名完素早遇陳希夷服仙酒醉覺得
悟素問玄機著原病式一卷宣明論五卷

元劉因

容城人父述讀書無所不通因天資穎悟過人
而留心性理之學家雖貧非其義一介不取隱

居教授至元間徵授右贊善大夫卒贈翰林
學士諡文靖封容城郡公號靜修先生

劉秉忠

邢臺人蚤遁迹浮屠博學多才藝深于數學
世祖召見大奇之留置左右迨下江南常贊

世祖以天地好生為德世祖即位拜太保領中
書省事益以天下為己任建國號定郡邑頒章

服立朝儀凡事有關於國家大典者必酌古
今之宜焉卒贈常山王諡文正有文集十卷

劉秉恕

秉忠弟好讀書受易于劉肅遂明理學世祖
召見擢禮部侍郎歷彰德等五州總管所至

皆有惠政召除禮部尚書出為
淮西安撫使終平陽路總管

劉肅

字才卿洛水人金興定初詞賦進士累官戶部
主事金亡依東平嚴實元中統初擢真定宣撫

使後商議中書省事致仕肅性舒緩有執守嘗
集諸家易說曰讀易備忘後追封邢國公諡文
獻

劉宣

潞州人徙太原沈毅清介有經世志嘗從許衡
講明理學累官吏部尚書時伐交趾再征日本
宣上疏諫累遷行臺御史中丞節操為世所重卒諡忠憲

劉恩

洛水人徙威州父辛元初為貝州長恩幼知讀
書勇而有謀以管軍總管入蜀與宋將戰授成
都路副萬戶後同僉行樞密院事招降夔
府等州邑授副都元帥子德祿襲萬戶

劉伯林

濟南人任俠善騎射金末為威寧防千戶歸元以功累遷西京留守兼兵馬副元帥伯林

在威寧十餘年務農積穀與民休息隣境凋瘵而威寧獨為樂土及卒追封秦國公

劉焜

伯林子累立戰功官至成都路軍民經畧使封秦國公卒諡忠惠子元振元禮皆有勇畧元振

官至潼川路副招討使元禮潼川路漢軍都元帥乞解官養母從之

劉元禮

焜之子沈厚有謀至元初累官潼川路漢軍都元帥宋制置夏貴率軍五萬犯潼川元禮

所領止數千諸將咸有懼色元禮曰料敵制勝在智不在力乃出戰屢破之復大戰達溪元禮激厲將士大呼突入陣所向披靡大敗貴兵又奏修眉州城以扼嘉定往來之路從之興役七日而畢宋人駭其速元禮鎮守眉州五年乞解官歸養母從之

劉霖

安福人少從虞集學博通五經元季寇陷安成乃避地泰和學者師尊之性耿介所著有四書

纂釋太極圖解易本義童子說社詩類注

劉賡

字臨載肅之孫少有文名至元間用薦者授國史院編修累遷集賢大學士兼國子祭酒復為

翰林學士承旨久典文翰當時大製作多出其手以耆年宿德為朝廷所推重云

劉正

清州人讀書習吏事至元中累官吏部尚書侍御史武宗時為中書右丞仁宗即位正詣闕言

八事終平章政事卒諡忠宣子秉德歷兵工二部侍郎秉仁累官工部尚書致仕

劉敏中

章邱人祖鼎仕為郎中李全攻濟南鼎以書諭之全引去敏中幼卓異不凡至元中為監

察御史劾權貴不報辭職歸復起歷集賢學士商議中書省事上疏陳十事累遷翰林學士承

旨卒謚文簡所
著有中卷集

劉整

鄧州穰人沈毅有智謀善騎射宋制置使孟珙攻金信陽整為前鋒克之累遷至瀘都元帥習水戰攻圍襄陽進河南行省參政遂破樊城守襄陽者以城降進中書左丞卒謚武敏

劉詵

廬陵人幼失父年十二能文章宋遺老一見即以斯文之任期之在元屢薦皆不起其為文根抵六經躡轢諸子百家融液今古而不露其蹕厲風發之狀所著有桂隱集

劉岳申

吉水人仕為遠陽儒學副提舉以太和州判致仕其文辭簡約峻潔甚為吳澂虞集所推

重遠近學者師尊
之稱申齋先生

劉畊孫

茶陵州人至順初進士尹臨武縣大興學校歷建德徽州瑞州三路推官所至政績卓然

轉寧國路賊攻寧國城陷死之弟燾孫為常寧州學正賊陷常寧亦死之其子碩為江夏縣魯

湖大使起義兵拔茶陵又死之

劉濬

河南人為連江縣巡檢至正中賊帥王善寇閩濬與仲子健將兵拒賊三戰三捷衆多潰濬與

賊鏖戰被執大罵而死賊義之舍健健結死士詐流丐賊中夜半發火大譟賊驚擾健手斬殺

其父者事聞贈濬官立祠授健古田縣尹

劉德

奉先人父娶後妻何氏德事之如所生家貧傭工取直寸錢尺帛皆上之四弟並何出德撫愛

尤篤年五十未娶稱貧得錢悉為弟求婦諸弟亦化其德一門藹然鄉里稱為劉佛子

明劉基

字伯溫青田人元進士後棄官歸隱本朝初召至金陵陳時務十八策自是屢從征伐授太史

令累遷御史中丞兼弘文館學士論功封誠意伯致仕卒所著有郁離子覆瓿集寫情集犂眉公集子建官至江西右參政孫薦襲封伯爵今錄其後一人為翰林五經博士基剛毅慷慨有大節論天下安危義形于色與人又開心見誠至義所不可則無少假借高皇稱基忠誠任以心膂自謂不世之遇知無不言每遇急難勇氣奮發計畫立就人莫能測其機今觀御書詔誥之推獎國計事數之商確彌綸參贊殷周以來一人而已

劉崧

字子高泰和人七歲能賦詩其世父養蒙甚奇之洪武初以明經薦授歷官職方郎中北平按察副使禮部侍郎權吏部尚書尋致仕歸雅好山水每登臨賦詠自號槎翁後復召拜國子司

業卒有職
方集行世

劉雋

字子奇江陵人洪武進士歷戶兵二部主事郎中遷右侍郎進尚書永樂間征安南督理軍務

有功既還餘寇猖獗復命雋往征提兵至大海口援絕被執不屈而死洪熙初贈榮祿大夫

柱國少傅謚節愍官其子奎給事中

劉迪簡

宜春人學邃于易詩春秋吳元年徵入京授尚賓館副使陳時務五十條及進皇王大學

通音奉詔使交趾至南寧道卒所著有尚賓集孫衡舉于鄉任常州府通判揚州府同知有政

聲

劉子華

字昭甫明春秋工為詩詞洪武初以明經薦太祖御奉天門召見命賦開平王常遇春挽

詩子華即承詔賦詩少選而成其詩揮戈十載定河山忽報星沈易水灣馬首西風旌旆捲天

涯落日凱歌還功成楚漢興亡際名在韓彭伯
仲間聖主思功心獨苦黃金直欲鑄真顏大稱
旨授大興同知改青州推官政績懋著子仕諤
郡學生未弱冠領鄉薦及廷對太祖覽其策曰

有用之才也乃賜進士
及第授翰林院編修

劉逵

項城人性寡默善書翰家世以忠孝相承鄉邦
稱之洪武間以人材舉薦累官至刑部尚書

劉禮

臨潁人性醇實器量不凡自幼嗜學久歷
仕途才名著稱累官至湖廣左布政使

劉醇

祥符人能詩善屬文洪武末以儒士起家累官
周府長史致仕年九十餘號菊莊先生有菊莊

集若干卷

劉允

字子允富塗丹湖人師事李翼洪武四年以進
士及第授懷慶通判三年以直道不偶謫瑞安

縣丞在官興學勸農均徭理訟克當人心起拜
北平按察司副使考績留教授親王于內後請
老卒于家允不獨政事之才綽乎有餘地其為
人尤侃侃善議論每召對多稱旨博學喜吟咏
質而不俚蓋
以其為人也

劉貞

合肥人開國功累陞左軍都督充大寧總兵官
修懷來城池改左軍北平兵起貞及陳貞卜萬
引大寧軍出松亭關營沙河欲復遵化亭有貳
心文皇入大寧盡握其軍以行遂入松亭關貞
夜負敕印浮海歸時建文君聞北平諸將降文
皇籍貞家下獄貞由海道出福建還京詔釋
其家靖難後陞左都督鎮遼東恒懷愧憤永樂
元年卒貞長女文皇昭順德妃也以故得免於

禍次女
伊王妃

劉江

桃源人洪武中任燕山中護衛百戶後從兵靖內難累立戰功進陞中府都督

劉傑

江陵人節愍公偁之弟幼敦行義宗黨咸以孝悌稱洪武間以經明行修舉試優等授吏科給

事中論劾無避諸有私歟者皆畏恐其知之陞雲南參議興利去弊民夷畏服致仕歸甚貧

劉有年

沅州人洪武中以明經為州學訓導當道者奇其才薦陞監察御史激揚有聲擢太平府

知府永樂中上儀禮逸經十有八篇未幾轉交趾按察司僉事時黃福以尚書掌司事重其為

人俄以疾卒福哭而祭之曰江淮胄次洙泗規模文布韓柳學祖程朱

劉廣

羅田人洪武中以軍功為指揮僉事守永平有膽畧善用雙刀嘗病且殆語人曰吾富臨陣死

王事安能居牖下死兒女乎後敵騎入寇廣率四十餘騎與遇于城北力戰死之事聞遣使

護喪至京賜其家楮幣以葬

劉三吾

字如孫茶陵人洪武中薦舉授左贊善仕至翰林院學士主考會試獲罪免三吾為人慷慨坦夷不設城府自號曰坦翁

至于大節則屹乎不可奪也

劉季篬

名韶以字行餘姚人洪武進士授行人仕至刑部右侍郎謫工部主事卒為人清素雖歷

顯要而怡然自持雍容雅度有陶靖節韋蘇州之趣

劉璟

字仲璟青田人基次子高廟時拜閣門使以剛直聞改授谷府長史并救提調肅速慶寧燕趙

六府事谷邸在宣府璟設險足兵諸胡屏息北平兵起詣闕獻策命赴李景隆軍歷諸險阻以

歸文廟登柱後召用之辭以疾逮繫至京入見猶稱殿下下之獄自經死

劉亨

字嘉會廬陵人洪武中授壽州訓導建文初陞武進縣丞北平後棄官宣德中召不起正統中

卒

劉政

字仲理長洲人性聰睿肆力問學洪武己卯中式鄉試第一時主考方孝孺批其文有羣鳥中

之孤鳳及吾黨有虛左之語政平生忠義自許北平兵入聞孝孺死不食死之

劉端

南昌人建文二年進士遷大理寺丞廉明執法失位後與同邑王高並坐縱方孝孺息樹陰剗

鼻而終高與端同年進士又與端同官或曰高為刑部郎中

劉子輔

廬陵人由太學生擢監察御史陞廣東按察使卓有憲體坐累左遷交趾諒江知府撫民

如子時叛寇猖獗子輔率兵民固守寇悉衆來攻城陷子輔與其妻子死之兵民皆死無一人

降者事聞贈
布政司參政

劉髦

永新人永樂戊子鄉試易魁後不果任教授鄉
閩學博行莊不干仕進事母以孝稱鄉人化其

德所著有易傳撮要修身箴履齟集少師
楊士奇重其篤學以子賁贈司經局洗馬

劉廣衡

字克平萬安人永樂進士授刑部主事用法
平恕陞陝西按察司副使遷右布政使尋陞

右副都御史轉刑部尚書為人
清修簡朴不事浮靡有古人風

劉中敷

大興縣人性恬澹忠厚永樂初以守城功授
陳留縣丞累遷江西左參政山東左布政使

所至以愛人稱正統初召拜戶部尚書未幾
罷歸後起為戶部左侍郎兼太子賓客卒

劉鉉

字宗器長洲人由京闈鄉解授中書舍人預修
三朝實錄累陞翰林侍講學士國子祭酒轉詹

事府少詹事卒于官為人學行淳篤其教人以不欺為本善古文尤工于詩所著有假菴集

劉矩

字仲方大明開州人永樂辛丑進士及第矩已取狀元帝夢鶴上殿上翼日檢卷得曾鶴齡遂

寘為第一矩為第二授翰林編修陞修撰矩方正古朴有至行學問宏深以理為宗嘗以程明道張橫渠為準範平生未嘗失口於人為文溫醇典則筆力遒勁至今鄉邦稱古君子以矩為

首去官養病卒于家祠鄉賢

劉昱

武城人初任吏科給事中陞通政司左通政河南左參政改交趾右參政昱勇于有為所至吏民畏憚征交趾與尚書劉儁贊點國公沐晟軍務被圍與儁同死之

劉觀

長洲人父毅以醫給事燕邸坐法籍入之永樂初念舊臣召觀還為尚醫賜第一居貴人有所

苦皆令觀治之扈從北巡歸卒子博有雋資以古經方散佚論病之淺深不能中博求諸家書遂及陰陽刑法五行星歷靡不究該以醫薦為掾史已已之役知博者薦之徐武功素善博引與謀博見徐銳欲白去曹石而視徐面有異曰公旦夕且有不可測果被逮

劉球

字求樂安福人永樂進士授禮部主事薦改侍講以直諫死獄中贈翰林學士諡忠愍子鉞鈺舉進士鉞廣東參政鈺雲南按察使俱振沒出仕球天性孝悌忠潔寬平議論堅正慷慨常依名節沈思積學好義力行文詞鏗鏘

劉榮

宿遷人勇畧過人襲父職永樂中以從征南伐有功累增祿秩進封廣寧伯卒追封侯爵諡忠武榮謀慮多善戰遇倭斬首七百四十二生擒八百五十七自是倭不敢犯遼東

劉實

字嘉秀安福人宣德進士改庶吉士出為金華府同知陞南雍知府忤權璫卒獄中實生平清

勁甘心貧窶與古廉吏范丹李及無異利誘不回勢惕不沮

劉儼

字宣化吉水人正統進士第一累官春坊大學士太常少卿兼翰林侍讀為人性剛直遇事侃

侃不為世屈為文章春容典惟卒贈吏部侍郎謚文介

劉永

字克修大庾人永樂中由進士初授刑部主事陞郎中才名甚著奉敕巡撫萬全政望赫然正

統中陞荆州知府時方重郡守天下大府數十咸慎選其人永以大學士東里楊文貞公薦陞

荆州仍奉璽書之任庶介勸農興學均賦簡訟清吏弊遏強暴革郡政之為病者十數事兵民

共獲其利戴之如父母府城初有觀藩所行多不法民被害永疏聞于朝械繫下詔獄幾害命

朝審竟直其言復職處宗室如祖訓後守制去郡軍民寡母孤兒幾千人徒步走京師懇請于朝奪情起永復為郡前後歷十四年將大用卒于任民立祠肖像祀之至今不忘

劉昌

字欽謨長洲縣人正統元年方弱冠舉南畿解元明年以會魁登科為文瞻麗詩宗盛唐一時稱為名家景泰中官水曹嘗預內閣纂修天順元年罷還南都官至廣東參政卒著有中

州文表河南志姑蘇志文集等書

劉珥

字叔溫壽光人正統戊辰進士改庶吉士授編修仕至太子太保戶部尚書謹身殿大學士卒贈太保諡文和珥秉心不疑諒直無顧慮公無私嘗決天下大計一言而定利害不能奪有大臣之節抑邪嫉惡恒過於嚴以是小人多忌之

劉定之

字主靜永新人正統丙辰進士第三授編修成化二年陞太常少卿侍讀學士入內閣仕

至禮部左侍郎兼翰林院學士卒贈禮部尚書諡文安定之襟懷坦夷操履謙謹與人語色溫

氣和過人無貴賤大小一於恭敬其居官論事則執據義理詞峯峭厲雖勇者有弗及

劉璉

字宗器大興人正統乙丑進士歷刑部尚書子機字士衡成化丙戌進士歷刑部尚書

劉俊

字世英寶坻人正統乙丑進士第三歷禮部侍郎

劉孜

字顯孜萬安人正統乙丑進士歷工部尚書

劉宣

字紹和安福人景泰辛未進士歷禮部尚書諡文懿

劉昭

字克明邠州人景泰辛未進士歷工部尚書

劉敷

字叔榮永新人景泰辛未進士歷都御史

劉岌

字凌雲涪州人景泰甲戌進士歷兵部尚書

劉鈺

字仗和安福人忠愍公球之子也舉景泰五年進士歷官浙江提學副使學行不愧師模人咸

謂其有父之風云弟鈞字尚珮同科進士歷布政使

劉誠

字則明雞澤人弱冠登天順丁丑科進士第擢翰林院檢討時秀玉分封館閣以誠練達老成

陞秀府長史賜四品章服從王之國誠以禮輔導王多所啟沃著千秋金鑑錄以獻王嘉納之

於是並得游心典籍作周易衍辭補註皇極經世洪範等書立志直欲上追濂洛闕諸儒不

欲以文詞名王薨改寧國府同知還湖廣布政司參議所在政跡咸赫卒于官

劉大夏

字時雍湖廣華容人天順八年進士選翰林庶吉士尋授兵部主事歷陞職方郎中陞福

建參政歷浙江左布政勤於撫字緩於催科移檄郡縣務在節用愛人不許興無名工作郡縣

起解銀兩例有秤頭火耗嚴禁吏胥一毫不取弘治二年浙江鄉試大夏為提調官先期焚香

告天祈於得人以為國用是科果得人為多而王守仁胡世寧孫燧尤較著者也歷陞兵部尚

書受知孝廟每名入內廷從容論事裨益實多與大學士河南劉宇素不相能正德初逆瑾用

事宇昌言于瑾曰抄劄劉大夏可得金數萬乃被逮謫戍肅州貧無所資藩臬畏瑾不敢館殺

各學生徒相繼食之瑾誅復原官致仕卒諡忠宣

劉健

字希賢洛陽人天順進士改庶吉士授編修任至少師吏部尚書華蓋殿大學士忤瑾致仕卒

年九十四贈太師謚文靖嘉靖初存問又官其
曾孫為尚寶丞健骨相奇古學問深粹行淳履
正偉識偉才早際聖明晚罹奸佞進
不盈侈退不窘戚近世賢輔稱最

劉銳

字汝忠壽光人文和公瑀第四子成化癸卯蔭
補中書舍人時銳八歲召至文華殿起拜如成

人聖心嘉愛時召見門闕限高遽巷揚公常提
攜過之及文和致政奉侍養歸家居數年肆力
經史弘治壬子鄉試銳欲解廕就科目合各郡
儒士糊名試之開卷第一諸司屬望發解意欲
奏請冢宰尹公與銳為通家屢止之曰若子文
藝但取巍科憲廟之恩不可孤也銳乃止甲寅
北上除原職終太常卿兼翰林院五經博士歷
仕五十餘年進階資善大夫著述頗富有西橋
文集藏于家

劉槩

字大節濟寧人進士成化二十二年知壽州廉

仁明果發奸摘伏如神捐點屏息招延名儒振

作黉序以及鄉社禁止佛老師巫境內淫祠廢

革殆盡建石橋通濟行旅置義塚收埋遺骸城

鄉各設預備倉積穀七萬五千餘石集賦罰課

羨買耕牛六百餘隻救患貧農仍歲給子種一

千八百餘石以達農務恤養孤老崇獎風節雖

古良牧無加焉然直節自遂每遇監司亦不少

下坐此賈囊弘治元年入覲值郡人御史湯鼎
以言構禍因逮及焉郡民赴京陳救以干計會
吏部尚書王恕亦憐其誣力為申白得戍海州
踰載會赦還籍嘉靖六年知州劉天民檄請從

祀名
宦焉

劉忠

字司直陳留人成化進士改庶吉士授編修仕
至少傅吏部尚書武英殿大學士致仕卒贈太

傳謚文肅忠性峻少通行方寡合一介不苟在內閣未久無大建明然重厚持正為貴倖所嫉

劉纓

字與清蘇州人成化戊戌進士歷尚書

劉璟

字德輝鄆陵人成化乙未進士歷尚書子詡字思存正德丁丑進士歷尚書

劉璣

字用齊咸寧人成化辛丑進士歷兵部尚書

劉戩

字景元安福人成化乙未進士第二任右春坊右諭德

劉丙

字文煥安福人成化丁未進士歷兵部侍郎謚恭襄

劉春

字仁仲巴州人成化丁未進士第二歷禮部尚書謚文肅

劉節

字介夫江西大庾人弘治乙丑進士歷任浙江左布政使好賢禮士見學官弟子每延歎而咨

訪之不屑以俗吏自居
仕至刑部侍郎致仕

劉龍

字舜卿襄垣人弘治己未進士第三歷禮部尚書謚文安

劉懌

字濟民濟寧人弘治己未進士歷都御史

劉愷

字承華新安人弘治庚戌進士歷尚書

劉玉

字咸粟萬安人弘治進士授輝縣知縣陞御史
件瑾逮詔獄削籍瑾誅起河南按察司僉事仕

至刑部左侍郎以大獄事罷歸隆慶改元贈尚
書謚端毅玉學一主於誠故終身無浮詞偽行

孝友信讓時靡間言居官一志公家秉正嫉邪
端方清白終始一節博通羣籍尤長于天文地

理凡軍謀師律儀章法制
皆詳究其本末惟所用之

欽定四庫全書

卷六十

劉瑞

字德符四川內江人弘治丙辰進士歷陞浙江按察使提學校士公明先德行而後文藝所行

條約切于身心仕至南
京禮部侍郎謚文肅

劉麟

字元瑞一字子振南京鷹揚衛籍江西安仁人弘治丙辰進士外戚張氏驕橫臺隸麗津等歷

詆罪狀天子震怒下詔獄逮治麟獨上疏申救授刑部主事出守紹興蒞任纔五十餘日四封

驩然戴之若數十年者以不修問逆瑾矯旨廢為編民郡人為立生祠貧不能歸遂寓居長興

與邑民吳玠郡人施侃宜春龍霓關中孫一元結社稱為湖南五隱瑾誅起知西安陞陝西參

政歷工部尚書奏建節慎庫與臺臣同典出納自是財無濫用凡工部上供平闕內府中貴人

輒陰自損增不受覆覈麟乃條上當裁省者一十四事並見嘉納中貴人以是憾之會遣近瑞

督造龍袍于蘇松麟謂尚衣自有常供請罷之
而噍者益深竟令致仕麟家居三十餘年蕭然
一室賦詩自娛有求見者往往避扁舟往來
郡大夫物色訪之始得一見見亦不談公事麟
平生尚氣節以文學馳名於時律詩步驟盛唐
追漢魏字法義獻短牘數字亦不苟作時出詭
語雋永有味片紙隻字人得之為至寶末年一
意靜養求之者俱不應嘗欲建樓以居無力內
翰文衡山繪一圖名曰神樓騷人墨客爭詠之
衣冠必法古制年八十有八卒贈太子少保諡
曰清

劉源清

字汝澄東平人正德進士授江西德興知縣
調進賢濠平陞御史仕至兵部左侍郎兼都

御史總督大同三鎮軍務忤權貴逮詔獄為民
隆慶元年復職源清崛起寒素偉幹負氣臨義

奮不顧利害宸濠之起禍也偽徽之傳道經進賢而源清斬其使燬其檄閉妻子杜門以死誓戰不利則將焚妻子自殺以報國濠竟以不得援而敗惜忌功者多不得錄識者憾之不

劉天

和字養和湖廣麻城人正德三年進士以御史謫知金壇縣嘗贊畫軍門平孝豐湯毛兀之

亂尋陞湖州府知府正直忠厚練達精明以古良二十石自期待郡志稱其疏定賦役則例以便征輸特其一事也歷陞都御史巡視河道駐劄濟寧每遇士人初入仕者輒與談守已行政之要務成人之美仕至兵部尚書總制陝西三邊有名天和端毅有謀風裁凜然盡心國事鞠躬盡瘁其經畧西戎夷人不敢忘中國大義非天和之德望才畧致然哉卒諡闕

劉棟

字元隆山陰人正德辛未進士歷官刑部侍郎

劉校

字字夏河南許州人正德辛未進士歷刑部郎中諫南巡杖死贈太常少卿

劉希龍

字仁甫安邱人正德甲戌進士歷尚書

劉大謨

字遠夫儀封人正德戊辰進士歷都御史

劉士元

字伯孺彭縣人正德甲戌進士歷都御史

劉彭年

字惟靜巴縣人正德甲戌進士歷都御史

劉儲秀

字士奇闕中人正德甲戌進士嘉靖中任浙江左布政使剛方有治才旬宣所及深得民心

至戶部尚書

劉懋

萬安人嘉靖甲辰進士授司空尚書郎稅荊州知嘉興府時倭夷犯浙西兵部尚書張經提兵

歷境憇為調度糧餉民不勞而事辦比趙文華以工部尚書視師海上暴橫索賂少不如意陷以大辟憇終無以應之第相見不激不阿而已文華卒不能害後轉兩司存陞太僕寺卿擢僉都御史撫治湖廣憇約已勤職每日詳駁案牘常至夜分喜諸司陳說利害凡建白當事情者即付之施行嘗濬竹筒河以救漢水之勢沿江郡縣至今賴以播植施州土官覃壁劫印烝妓謀為不軌憇上其逆狀討之親書方略日致營中覃壁力屈自詣轅門伏辜比罷兵陞大理寺卿轉南京工部侍郎然竟以兵事積疲邁疾行至潯陽道中卒

劉塾

字汝寧鄱陽人嘉靖己丑進士初任歸安大著聲譽累官光祿寺卿

劉望之

字商霖內江人嘉靖丙戌進士歷大理寺卿子翔壬戌進士翔戊辰進士

劉學易

字道甫，壽光人。嘉靖戊戌進士，歷戶部右侍郎。

劉大實

字子虛，確山人。嘉靖戊戌進士，歷戶部侍郎。

劉養直

字敬夫，內江人。嘉靖戊戌進士，歷戶部侍郎。

劉起宗

字宗之，巴縣人。嘉靖戊戌進士，歷行太僕寺卿。

劉自強

字體乾，扶溝人。嘉靖甲辰進士，歷戶部尚書。

劉穩

字朝重，郟縣人。嘉靖丙辰進士，歷太僕少卿。

萬姓統譜卷六十

欽定四庫全書

萬姓統譜卷六十一

明 凌迪知 撰

下平聲

十一尤

周

汝南角音帝營生后稷至太王邑于周文王以國為氏又周平王子封于周者謂之周家望出沛國陳留

周

周伯陽

讀史知周亡

周霄

見孟子

周舍

事趙簡子立簡子之門三日三夜簡子使人問之曰子何以令我周舍曰願為諤諤之臣莖筆

操贖隨君之後司君之過而書之

漢周繆

沛人以舍人從高祖起沛至灞上西入蜀還定三秦常為參乘戰有利不利終無離上心封信

武侯

周苛

以御史大夫守滎陽項羽破城苛罵不絕口羽怒烹之唐李觀碑稱其能立節顯主

周昌

沛人兄苛守滎陽項羽破之烹苛高祖拜昌為御史大夫從破項羽有功封汾陰侯昌強力敢直言高祖欲易太子昌力爭不奉詔為趙王如意相王卒因謝病去

周勃

沛人以材官引強從高祖戰功居多高后崩與丞相陳平議誅諸呂迎代王即位是為文帝勃

為丞相後以解侯就國卒諡武侯

周亞夫

勃次子仕為河內守封條侯文帝六年匈奴大入寇以為將軍屯細柳帝自勞軍有真將

軍之嘆景帝時吳楚反以亞夫為太尉擊平之後拜丞相

周堪

文安人宣帝時論經石渠惟堪最高元帝時與蕭望之並領尚書以師傅見尊重尋為石顯所

譖皆免官望之自殺帝後悟乃擢堪為光祿勳遷太子太傅

周紆

下邳人少好韓非之術永平中補行唐長遷洛陽令下車先問大姓吏數閭里豪強以對紆厲

聲曰本問責戚爾豈能知此賣菜傭子後免官又徵為御史中丞終將作大匠

周榮

字平孫廬江人章帝時舉明經辟司徒掾安府及安與竇憲有隙或謂榮曰子為掾公腹心之

謀排奏竇氏竇氏刺客滿城謹備之榮折之以正理而不懼及竇氏敗名遂顯

周興

榮子少有名譽永寧中尚書陳忠薦興孝友之行著于閩門清勵之志聞于州里蘊藉古今博

學多聞詔
拜尚書郎

周黨

廣武人家產千金散與宗族游學長安建武初被徵三聘乃肯就車陸見帝廷伏而不謁自陳

願守所志詔賜帛四十
匹寵之遂隱居龜池

周義山

字季道汝陰人丞相勅之後也父秘陳留刺史義山年十六讀書外常以平旦日出時東

向嗽咽服氣百數經年父問之對曰義山中心好此日光長景之暉是以服之是歲陳留荒多

饑民義山傾家財以濟之有黃泰者元鳳中寓陳留著敗衣賣芒履義山見之曰聞儂經云儂

人目方面光密竒之使人買芒履常以金帛著物中陰以與之泰後詣義山延之靜室泰曰聞

君好道陰德流行感於我是以相詣我中嶽僊人蘇子玄也義山再拜膝行而進自陳少好長

生今靈啓神降得接聖顏乃請乞竒要僊人遂授以長生之道後義山為紫陽真人白日昇天

周景

字仲饗興子辟司徒梁冀府遷豫州刺史河內太守拔才薦士常若不及累官大司空是時宦

官任人及子弟充塞列位景初視事即與太尉楊秉舉奏諸奸猾自將軍牧守以下免者五十

餘人朝廷肅然

周澤

安邱人少習公羊嚴氏春秋中元初遷龜池令吏人愛之後拜太常果敢直言顯宗嘗以北地

太守廖信贓物班諸廉吏惟澤等數人持蒙賜焉是時在位者咸自勉勵

周術

字元道太伯之後高帝時與東園公綺里季夏黃公俱出定太子號四皓又角里先生一號霸

上先生今太湖中洞庭山西
南中有用里村是其所居

周璆

樂安人高潔之士前後郡守招命莫肯至惟太守陳蕃能致焉字而不名特為設一榻去則懸之

周燕

安城人為郡決曹掾太守欲枉殺囚燕諫不從囚家赴闕稱寃詔遣覆考燕見太守曰願將文書皆著燕名府君但言時病而已乃收燕繫獄遂不食而死五子皆至刺史太守

周防

字偉公汝陽人師事徐州刺史蓋豫受古文尚書舉孝廉拜郎中撰尚書雜記三十二篇太尉張禹薦為博士

遺陳留太守

周嘉

字忠文燕四世孫仕為郡主簿王莽末羣賊入汝陽嘉從太守何敞討賊白刃交集嘉以身捍

敞後舉孝廉拜尚書郎光武問以遭難之事稱
為長者遭零陵太守及卒吏民立祠從弟暢為

河南尹歲旱久禱無應暢收葬客死骸
骨凡萬餘人應時澍雨位至光祿勳

周磐

安成人好禮有行居貧養母和帝末就孝廉舉
拜謁者除任城長遷陽夏重合令後思母棄官

還鄉里母沒哀毀服終廬
冢則教授生徒以終其身

周章

字文叔南陽隨人仕為南陽郡功曹為竇憲免
就國太守欲謁之章曰不可太守不聽章以風

刀絕馬鞅乃止憲誅公卿多以交關得罪太
守幸免以此重章舉孝廉永初元年陞司空

周燮

安成人燕之後生有醜狀駭人母欲棄之父不
聽在髻髻知廉讓十歲通詩長精禮易不讀非

聖書非身所耕漁不食舉孝廉賢良方
正安帝又以玄纁羔幣聘之皆以疾辭

欽定四庫全書

萬姓統譜
卷六十一

四

周舉

字宣光防子姿貌短陋而博學洽聞為儒者所宗順帝時舉茂才為平邱令上書言當世得失

帝置章御坐以為規戒遷并州刺史革其禁火風俗陽嘉中徵拜尚書後拜光祿大夫

周勰

字彥和舉子少尚玄虛時梁冀貴盛被徵命者莫敢不聽唯勰前後三辟竟不能屈常隱處社

絕人事巷生荆棘十有餘歲至延熹初乃開門延賓及秋而梁冀誅

周福

字仲進甘陵人桓帝徵時受學于福及即位擢為尚書時語曰因師獲印周仲進由是甘陵有

南北
部黨

周魴

字子魚陽羨人少好學舉孝廉為寧國長歷鄱陽太守魏兵潛入皖魴與陸遜斬賊萬數賊帥

董嗣鈔豫章諸郡
復設奇計平之

周瑜

字公瑾廬江人英達夙成有文武籌畧與吳孫策相友善取荊州以瑜為中尉軍程普嘗告人

曰與公瑾交若飲醇酎不覺自醉嗣後孫權用瑜計大破曹操于赤壁瑜少精音律或有缺誤

必顧諺曰曲有誤周郎顧年三十六卒于巴邱子允以功封都鄉侯

周乘

交州刺史上書云交州絕域習俗貪濁彊宗聚姦長吏肆校侵漁萬民臣欲為聖明掃清一方

時屬城解綬者三十餘人

周宣

樂安人初為郡吏魏文帝以為中郎屬大史其占夢十中八九世以比建平之相

周羣

閩中人父舒明天文術數羣少投學于父專心候業于庭中作小樓家富常令奴更直于樓上

視天災變見一氣即白羣羣上樓觀之凡有氣候無不見者所言多中昭烈甚重之

周賓

陽美人少折節早亡吳初召為諮議參軍舉郡上計轉為州辟從事別駕步兵校尉光祿大夫

廣平太守

子曰魴

晉

周浚

字開林安成人性果烈以才理見知仕晉為揚州刺史隨王渾伐吳吳平以功封成武侯鎮林

陵遷侍中三子顛嵩謨武帝嘗問浚卿宗後生稱誰為可答曰臣叔父子恢稱重臣宗從父子

頽稱清臣宗武

帝並召用之

周顛

字伯仁浚子少有重名神采秀徹元帝鎮江左請為軍諮祭酒累遷尚書左僕射為護軍將軍

王導甚器重之逮王敦構逆顛以忠義折之遂被害弟嵩累官御史中丞

周處

字子隱勳子少孤膂力絕人好馳騁田獵不修細行州里患之處自知為人所惡有改厲之志

謂父老曰今歲豐何苦不樂邪父老嘆曰三害未除何樂之有處曰何謂也答曰南山白額猛虎長橋下蛟並子為三害遂入山射虎沒水斬蛟勵志為善力學好義初仕吳為東觀左丞後歸晉累遷御史中丞糾劾不避寵戚所著有默語及風土記等書三子玘靖札

周玘

字宣佩處之子強毅沈斷閉門潔己不妄交游舉秀才除議郎太安初起義討平妖賊張昌叛人錢繪拜吳興太守烏程縣侯甚有威惠境內寧謐帝以玘勲誠並茂置義興郡以彰之

周訪

字士遠潯陽人自少沈毅果斷而能謙讓為縣功曹元帝立以為揚烈將軍討華軼平江州定漢沔累遷都督梁州諸軍事屯襄陽遠近悅服蔚然為中興名將王敦忌之雖懷逆謀不敢發

卒諡曰壯

周撫

訪子彊毅有父風元帝時累官征虜將軍後擊破蜀餘寇遷鎮西將軍卒謚襄弟光亦有父風

從溫嶠破蘇峻有功賜爵曲江男

周楚

撫子監梁益二州襲爵建城公世在梁益甚得物情楚以討平司馬勲進冠軍將軍卒謚定子

瓊勁烈有將畧歷數郡累遷梁州刺史建武將軍

周虓

撫孫歷官梓潼太守虓固守涪城遣步騎送母妻抵江陵為堅將所獲虓不得已降堅後與堅

兄子苞謀襲堅事泄堅引問虓曰虓世荷晉恩生為晉臣死為晉鬼復何問堅曰殺之適成其

名梓之徙于太原病卒其子興迎致其喪贈龍驤將軍益州刺史

周光

撫之子訪之孫年十一見王敦敦謂曰貴郡未有將誰可用者光曰明公不恥下問竊謂無復

見勝以為
寧遠將軍

周續之

字通祖雁門人徙豫章太守范甯于郡立學
招集生徒續之年十二請甯受業居學數年

通五經五緯號曰十經名冠同門既而入廬山
與劉遺民陶淵明俱不應徵謂之潯陽三老

周崎

邵陵人為湘州從事王敦之難譙王承使崎求
救于外與周該俱為魏義所執義責崎臨以白

刃曰汝為語城中稱為大將軍已破劉隗等外
援隔絕我當活汝崎偽許之既至城下大呼曰

王敦軍敗于湖甘卓已克武昌即日分遣大
眾來赴此急努力堅守賊今散矣義救之

周該

慈利人以義勇稱從父級宜郡內史王敦為逆
級遣該使湘州約譙王承甘卓同獎王室為敦

所執訊掠之至死不
言級由是得免于難

周翼

郗鑿外甥少過饑亂賴鑿得存郗亡翼為剡縣令解職歸心喪終三年後歷青州刺史少府卿

周筵

卓犖有才幹拜征西將軍吳郡太守及王敦作難加冠軍將軍都督會稽吳興義興晉陵平陽

軍事率水軍三千人討沈充未發而王師敗績筵聞叔父札開城納敦憤吃慷慨形于辭色尋

害遇

周馥

字祖宣遷吏部郎選舉精密為鎮東將軍振立中朝素有俊彥之稱以功封永寧侯子密字太

立性虛簡時人稱為清士位至尚書矯字正立亦有才幹

周札

處子字宣季兄弟察孝廉除郎中歷散騎常侍轉右將軍封漳浦亭侯時兄子懋晉陵太守清

流亭侯筵征虜將軍武康縣侯縉太子文學都鄉侯懿烏程縣公一門五公貴盛未有比

周嵩

字仲智顛之弟元帝時為御史中丞帝見王敦勢甚盛疎忌王導等乃上疏言君懷術以御臣

臣挾利以事君君臣交利而禍亂相仍帝感悟故尊等獲全

周稹

字國寶會稽人好學尤長于兵書永徽間四境盜起稹糾合鄉人拒之眾寡不敵賊誘之從為

亂稹怒曰恨不斬汝萬段肯從汝反邪遂手刃數十人自刎死事聞立廟祀之

南周顥

字彥倫建康人其先汝南人顥于鍾山西立隱舍清貧寡欲終日長蔬後應詔出任將過北山

孔稚圭乃作北山移文以却之後累官國子博士兼著作所著有四聲切韻

周捨

字昇逸顥子博學精義理齊時弱冠舉秀才除太學博士梁初召拜尚書祠部郎禮儀損益多

自捨出累遷吏部郎豫機密二十餘年帝以為有公輔器後與徐勉同參國政俱稱賢相

周盤龍

義興人仕齊累功封純陽侯建元初魏攻壽春以盤龍假節助桓崇祖拒敵大破之又與

魏軍戰盤龍父子兩騎繫攬數萬人敗魏軍後還散騎常侍武帝戲之曰卿著貂蟬何如兜

鍔盤龍曰此貂蟬從兜鍔中出耳

周弘正

字思行捨從子年十五召補國子生仍於國學講易諸生傳習其義普通中初置司文義

郎直壽光省以弘正為司義侍郎累遷國子博士入陳進尚書右僕射

周文育

字景德陽羨人本新安人姓項少孤貧義興周會奇之請于其母養為己子教之書計文

育曰誰能學此取富貴但有大槩耳遂教之騎射文育大悅仕梁以戰功最進爵壽昌縣公卒

諡忠愍

周寶安

字安民文育子父歿起為將軍領父兵南討陳文帝深器重之以功拜吳興太守襲封壽

昌縣公後遭左衛將軍領衛尉卿卒諡曰成

周弘讓

弘正之弟性簡素博學多通始仕不得志隱於句容之茅山頻徵不起梁承聖初召為國

子祭酒尋為仁威將軍城句容以居之命曰仁威壘

周碧

父寶安卒後亦為偏將征歐陽紇平定淮南並有功封江安縣伯歷晉陵定遠二郡太守太建

九年卒時年二十四贈電威將軍

周興嗣

世居姑孰善屬文嘗投宿逆旅有人謂曰子才學邁世當被知英主言訖不知所之梁天

監初奏休平賦累遷散騎侍郎法書中有王羲之草書十字患其不倫命興嗣以韻語屬之一

夕成文鬚髮為白遷給事中
佐撰國史有文集百餘卷

周昺

字文昭安成人有將帥才仕陳累遷都督江州
刺史進爵為侯田隴叔以江北叛入于齊昺討

斬之盡復江北之地
號平北將軍

周弘直

字思方弘讓之弟幼聰敏仕梁為西中郎湘
東王外兵記室參軍與南陽宗慄同掌書記

累遷昌州刺史入陳位太常卿光祿大夫弘直
方雅敦厚有集二十卷子確有行檢博涉經史

仕至都
官尚書

周澤

字穉都拜太常清潔循行盡敬宗廟嘗臥疾齋
宮妻問之澤大怒以妻干犯齋禁收送詔獄謝

罪

周羅暉

字公布仕陳與齊師戰勇冠三軍除豫章內史獄訟庭決不闕吏手人懷其惠

周山圖

字季寂義興人謹直寡言始仕宋當元嘉中魏主至瓜步山圖應募領白衣隊拒魏兵以

功加鎮軍將軍高帝輔政密啓除沈攸之及攸之敗高帝嘆曰周公可謂明于料事武帝時出

入殿省甚見信任轉黃門郎領羽林西廂直衛

周洽

南齊曲阿令廉約無私視民如子後擢都水使者卒之日無以為殯吏民買棺葬之

周謨

浚子兄顓被誣為王敦所害王敦死後詔贈戴若思譙王永等而未及顓時謨為後軍將軍上疏訟若思等既蒙寢顯而顓獨負殊恩疏奏不報謨復表陳然後追贈顓官謨兼少府丹陽尹

侍中中護軍封西平侯

周幾

代人也少以善騎射為獵郎明元即位為左部尚書以軍功封交趾侯太武以幾有智勇遣鎮

河南威信著于外境幾與奚斤等綏撫關中失和每至言論形于聲色斤等憚焉進號宋兵將

軍

周惠達

字懷文文安人父信歷樂鄉平舒成平三縣令皆以廉能著稱惠達幼有節操好讀書美

容貌魏齊王蕭寶夤為瀛州刺史召惠達及河間馮景同在閣下甚禮之

隋

周法尚

字德邁吳次子果勁有風采好讀兵書為定襄太守煬帝幸榆林內史令元壽請御營外

分二十四軍法尚曰結為方陣四面外拒六營宮及百官家口並在其間車騎為壁壘此與據

城何異若戰而捷抽騎追奔或戰不利屯營自守帝善之

唐周允元字汝良安成人武后時為御史中丞同鳳閣

鸞臺平章事后宴宰相詔陳書博善言允元曰恥其君不如堯舜武三思劾奏語指斥后曰聞其言足以戒安得為過

周墀

字德升汝南人第進士為監察御史集賢殿學士長史屬辭高古文宗雅重之累遷中書侍郎議河湟事不合罷為劍南東川節度使鄭顥言于帝曰世謂墀直言相亦以直言免帝悟加拜

檢校尚書右僕射卒贈司徒

周朴

福州人黃巢至福州得朴欲用之朴曰吾為處士尚不仕天子安能從賊巢怒斬之後人為立

廟以祀焉

周積

金壇人永徽間四境盜起積糾合鄉人拒之眾寡不敵賊誘之從為亂積怒曰恨不斬汝萬段

肯從汝為賊邪遂手刃數千人自刎
死事聞于朝封爵立廟至今祀之

周匡

物字箴本漳州人未有業儒者匡物兄匡著擢
貞元進士而匡物復擢進士官至高州刺史

唐世郡人登科者
始于匡物兄弟

周寶

盧龍人曾祖待選為魯城令安祿山反拒戰死
之祖光濟左贊善大夫父懷義工部尚書寶仕

武宗朝為檢校工部尚書節度涇源務力耕聚
糧二十萬斛號良將中和初進同平章事兼天

下租庸副使
功封汝南郡王

周繇

建德人調河南尉秩滿歸隱九華山僕射王徽
稱其孝悌可以表俗奏為建德令嘗著明皇夢

鍾馗賦弟繁亦有
文聲稱建德二周

周憬

下邳人王同皎與憬謀殺三思事泄斬同皎于都亭驛籍其家同皎且死神色自若延慶等皆

死憬遁入比干廟自剄將死謂人曰比干古忠臣神而聰明其知我乎後三思亂朝虐害忠良滅亡不久可干吾頭國門見其敗也憬壽春人後太子重俊誅三思天下共傷同皎之不及見也

五代周德威

馬邑人勇而多謀智望塵知敵數唐莊宗時累官至平章事盧龍軍節度使後與梁軍戰死

周密

神武人事晉歷郡延晉三鎮節度使周初以太子太師致仕子廣仕周累功為眉州刺史入宋

從征太原累遣
右屯衛大將軍

周彬

永新人南唐主鎮金陵彬囊文而往會有事圓丘募人為文乃用彬所著累官大理司直歸宰

本邑為政廉平嗣王錫以銀章
禹綬以寵異之官至尚書郎

周行逢

唐時為武平軍節度盡心為治所用官屬率皆廉介之士條教簡約民悅之

周本

吳王楊溥時與諸將至金陵勸進歸而嘆曰吾不能誅篡國者以報楊氏今老矣豈能事二姓

乎憤惋而死

宋周仁美

深州人開寶中從李漢超與契丹戰有功累遷右班都知戍環州屢敗蕃族後遷神龍衛

四廂都指揮又權京城內都巡檢先是巡兵捕亡卒盜賊不獲皆有罰而獲者無賞仁美因差

立賞格以聞
詔從其請

周渭

字得臣，恭城人。慷慨有大志，建隆初上書言時務事。太祖召試，稱旨，賜同進士出身。累官廣南

諸州轉運使。後徙兩浙、益州。卒貧不克葬。真宗

賻錢十萬以資其子。建中為乘氏主簿。渭在嶺南

周美

字之純，迴樂人。少隸朔方軍，以材武稱。真宗幸

澧淵，常令宿衛。累遷郟，副都總管。在邊前，後

十餘戰，平篋帳二百，復城堡甚多。每邊書至，未嘗辭難，所向輒克。諸將服之。孫永清、熟李靖兵

周輔成

道州人。世居營道。之漚溪，登大中祥符八年進士。歷官多善政。終于桂陽。令累贈諫議大

夫子
敦頤

周起

字萬卿鄆平人舉進士通判齊州累官右正言真宗東封還羣臣多獻文頌德起獨上書陳啓

戒歷知數府州所至有風烈官至樞密副使卒謚安惠起性周密家藏書至萬餘卷與弟超俱

能書集古今人書為說苑十卷

周儀

武岡州人雍熙初舉進士官至諫議大夫為嘉祐直臣居家以邵陵田分宗族子湛天禧中進

士孫欽宣和中進士

周希孟

字公闕侯官人通五經尤邃於易與陳烈陳襄鄭穆為友閩人號四先生知州劉夔曹頴

叔蔡襄皆親至學舍質問經義既而部使者相繼論薦詔賜粟帛授將仕郎試國子監四門助

教充本州學教授三表力辭不許卒門人曾伉等七百人相與塑像祠于五福寺有詩義春秋

義并文
集行世

周沆

字子真益都人舉進士歷官湖南轉運使以計撫降蠻族徙河東陝西河北皆有政績累遷龍

圖閣直學士知成德軍俗方棄親事佛沆閱按斥數千人還其家以戶部侍郎致仕

周審玉

開封人父勳隰州團練使審玉以廕補殿直累官千牛衛大將軍致仕嘗在定州監軍先

鋒劉緒陷賊審玉躍馬趣擊拔緒而還以勇敢聞故能累立戰功晚年好讀神農本草留意方術

周諤

字希聖光漢人熙寧六年登進士第歷知廣州新會縣王安石行新法郡縣風靡諤獨不奉行

致書政府力陳其弊因求歸田里所著有孟子解義一時門生稱為周夫子同郡王端字道原

善講學最為范祖禹所重嘉祐八年中進士第

周湛

字文淵鄧州穰人舉進士甲科歷官諸州拜右

諫議大夫知襄州湛天資彊記吏胥滿前一見輒識其姓名治煩劇能得其要所至喜條上利害前後至數十事以忤夏竦徙知相州未幾卒

湛善射弩雖隔屋亦中的云

周頡

字元吉歷官左右司郎中直龍圖閣福建運使有通巷集百卷與楊萬里程大昌洪邁諸賢唱

詠酬賡

周因

字通可浦城人為司農少卿出為荆南轉運使帝語及溪洞事對曰有邊事邊臣之福無邊事

朝廷之福時初得燕薊故因語及之

周行已

字恭叔永嘉人風儀秀整語音如鐘師事程伊川元祐初第進士為本州教授發明中庸

之旨邑人始知有伊洛之學

周堯卿

字子俞永明人警悟強記以學行知名登天聖初進士積官至太常博士范仲淹荐其經

行可為師表未及用而卒有詩春秋說各三十卷文集二十卷子諭鼎州司理參軍說歸安主

簿

周世南

祁陽人少好學遊上庠已定聘董氏女未婚而女失明女父請改婚世南父貽書問之世

南曰人生配偶有定分始全終廢天也既第成婚士論高之累官至駕部郎中以少卿致仕

周孟陽

海陵人登進士為王宮教授時英宗居環列孟陽嘗從容陳古事以諷英宗悚然起拜及

即帝位以為集賢殿修撰兼侍讀神宗初立啟沃尤多官至天章閣待制既卒兩宮惻然命官

其孫仍賜白金千兩

周長孺

字士彥澶淵人揚寘榜登第為衛州共城縣令得師曰邵康節先生士彥事先生執弟子

禮先生告以先天之學士彥性剛遇事輒發既從先生即淡然若無意于世者其季弟直孺怪

而問之士彥慨然曰此吾得于先生者士彥在共城獵有兔起草間自射中之即其處不復見

兔有石刻其文曰士彥當都而卒後士彥每至京師不敢留治平末以都官負外郎知劍州普

城縣卒歸喪過洛貧不能行康節留其家經紀甚備教其子純明以學問為娶程伊川先生之

姪後登元祐初進士第

周邦式

字南伯錢塘人少好學中元豐初進士第主
楚州實應簿調祥符尉知封邱縣通判磁州

鄂州提舉江東常平為淮南運判徙梓州路入
對留為尚書度支郎中邦式夷澹不樂中郎官

復出提點淮西刑獄徙兩浙又徙江東京師營
土木命輸殿材邦式奏言非地所產有需醉晏

斥宮禁事者邦式被命治詔獄其人自必死
獄成纔坐速徙代歸知宿州滑州皆不赴提舉

南京鴻慶宮起知處州辭不行積官中
大夫卒年七十五子芑蔚茂茨知名

周孚先

字伯忱晉陵人與弟恭先俱從程頤學頤嘗
謂孚先兄弟氣質清明可以入道其後俱由

鄉荐入太學孚先調四明鹽場改建
德尉不就後丐祠恭先終坑冶官

周永清

渭州鈐轄訓兵以李靖法蔡挺嘉其
整圖上之詔推於諸道又知德順軍

周恭先

字伯溫初見伊川先生先生曰從事覺有所得否學者要自得乎先問如何可以自得曰

思曰睿睿作聖須是於思慮間得之又問顏子如何學孔子到此深運先生曰顏子所以大過

人者只是得一善則拳拳服膺與能屢空耳兄弟繇鄉荐入太學氣質不少異尤篤於信道釋

褐授坑冶幹官每以沽名為戒謂子孫曰吾歿後毋為誌文碑銘以重吾不德終身恬於進取

周邦彥

字美成錢塘人涉獵經史性落魄不羈元豐中獻汴都賦萬餘言多用古文奇字神宗異

之自諸生召為太學正有文集二十四卷世傳其詞調最工仕至徽猷閣待制知順昌府

周師厚

鄞縣人皇祐中進士仕至轉運判官不肯奉行新法二子鈞銖皆登進士知名當世

周袞

金谿人嘉祐末舉進士王安石奇其才行新法之時以袞鄉人必附已欲用之議不合以負外

郎出知滕孫珩靖康初上書論
事不用歸隱麻山自號足翁

周沂

江山人少與趙抃友善抃嘗稱其為天下士視
軒冕為儻來又西安人任大中老於儒學作詩

寒苦亦為
趙抃所喜

周啟明

字昭回龍泉人舉進士又舉賢良方正既而
罷歸教授子弟百餘人不復仕進時號處士

轉運使陳堯佐表其行義詔賜粟帛仁宗時除
試助教遷至太常丞所著有詩賦雜文千六百
餘篇

周綰

字彥紉遂昌人舉進士與五郡入為國子祭酒
吏部侍郎敷文閣侍制自號蓮峰先生出入中

外六十餘年始
終以廉節著名

周種

泰州人字仁熟敬述五世孫少有遠度王安石一見奇之熙寧九年與弟扶俱擢第調江寧府

右司理持身謹廉元祐初蘇文忠公舉為鄆州教授種上疏乞以王安石配享神宗朝士愕然蘇公即自劾舉官不當議雖不合然識者猶取其拳拳師表之地久之擢著作佐郎兼崇政殿說書陳瑩中乃薦于上權起居舍人

周頴

字伯望江山人授業胡瑗以行義稱與趙抃李黼交抃為諫官頴嘗移書曰當公心以事君平

心以待物無以難行事強人主無以私喜怒壞公朝士大夫抃以書進乃召試賜進士第授校書郎王安石禮敬之問新法如何對曰歌謠甚盛安石喜扣其詞頴高誦曰市易青苗一路蕭條安石不樂出守樂清有文集行于世

周虎

字叔子慶元二年武舉第一名世家臨淮靖康南徙寓于常熟以右科除殿司步軍正將閩門

舍人充金國賀生辰接伴副使知光州楚州改知和州開禧二年敵會諸道兵長驅入寇犯和

州虎言衆曰吾國家守臣一朝去此則為奔亡之人失節敗名生不如死效死弗去雖死猶生

吾計決矣虎合戰凡三十有四殺敵驍將以十數最後射死右帥薩克達敵氣沮甚大創引去

於是和議始堅而江淮奠枕矣

周秩

秦州人熙寧中與兄種俱擢第歷官有聲紹聖中華元祐政時文彥博子及甫有私語忤時相

以秩為京西轉運使俾推治之秩至竟雪其冤

周春年

字春卿因之以廢補官調象山簿象山瀕海盜賊多伺賈舶殺人而奪其貨春年籍其

名犯者輒寘于辟惡俗大變遷撫州判官疏和
買害民於部使者江西一路俱得裁損民甚德
之改扶知仙遊縣饑民賴以全活盜賊為之
屏跡而囂訟者不得以售其奸終通判道州

周葵

字立義宜興人宣和進士歷官殿中侍御史知
無不言孝宗時為參知政事卒謚惠簡所著有

聖傳詩二十篇文集
三十卷奏議五卷

周瑩

景城人左領軍衛上將軍習知水利累
官杭州都監後遷知樞密院事贈侍中

周常

字仲修建州人進士補國子直講以養親求
教授揚州年未五十即致仕又被薦起徽宗時

為國子祭酒遷禮部侍郎蔡京用事
不能容以寶文閣待制出知湖州

周諤

字庶彥鄞人師厚長子也生而秀穎十四入太
學力學勤苦登元豐進士第並究六籍諸子百

氏之說悉論著其本旨為文肆屬競爽超古作者旁至天文地理罔不該博初調相城尉辭不赴廼遊潁昌訪舅氏范忠宣公時文潞公司馬溫公富鄭公皆在數得請益造詣速大國子祭酒豐稷給事中范祖禹交薦之後知南雄以言邊事忤時相入黨籍退休西浙作四休堂日與其弟承奉公藍與野榜徜徉山水間時為詩歌自娛所著有文集二十卷承宣集一卷明天集一卷六甲奇書一卷尚書右丞相宗愈翰林學士王覲重其才相繼以女妻之祭京作黨籍碑

婦翁舅甥入籍後以為榮

周嗣恭

字作肅因孫以世賞補官授萬安尉陟南雄州推官知邵陽縣累政積弊為之剷利別蠹

未數月庭無留訟部使者上其績幹辦諸司糧科院遺籍田令奏對論民疾苦皆閭里根本九

重未及知者上嘉納之知荊州軍得泰州即為
園池佚老之計日與親朋往來其間以自適疾
革忽大雨震電家人問以驚乎攝衣危坐曰吾
平生無欺心事何怖之有言訖而逝官至朝請
郎

周世脩

玉山人宣和進士知興國縣有平盜功僉書
建康府後以能應辦諸軍臺監交薦得對力
陳諸將之失
識者趨之

周執羔

弋陽人宣和中舉進士歷治郡縣有古循吏
風官至禮部尚書寶文閣學士立朝無朋比

屢上疏勸辨忠邪納諫諍孝宗嘉
納之平生手不釋卷尤通於易

周欽若

鉛山人累世業儒初有聲三舍間不就祿仕
積書教子病亟索筆書二百餘字戒四子曰

吾平生教汝等非為干祿欲敦義厚俗耳時子幼妻虞藏之及子長出示之諸子感泣白父訓

於官給令守之數世同居慶元中旌其門

周仁浚

開寶間初平嶺南命知瓊州既至擇偽官駱崇琛等四人列上分知澹崖振萬安四州因

其俗而治之紳有政績

周必大

字子充廬陵人舉進士又中博學宏詞科除秘書省正字兼國史院編修官高宗見其文

奇之孝宗即位除起居郎權給事中以力排權倖忤旨改福建路提刑後除參知政事遷樞密院使拜左丞相進少保益國公卒謚文忠祠于學有文集行世

周中

世居濰州建炎二年金人攻城率家人乘城拒守中弟辛家最富盡散其財以享戰士城陷中

閩門百口皆死紹興六年以周聿請贈官

周麟之

海陵人舉進士歷官兵部侍郎兼給事中高宗謂之曰給事之命非左遷也欲觀卿心術

耳充金國哀謝使言辭詳推敵為加禮後拜同知樞密院事

周南

字南仲吳人博學無所不通與孔元忠滕寇皆從業適遊紹興元年對策言甚切直是時專攻

道學南又力言之開禧中召試館職以言罷歸

周武仲

字憲之浦城人紹興中登第累官左司員外郎嘗使金還言金人貪詐輕與通好未為得

計宜講求禦戎之策童貫惡之謫居黃州高宗即位召為刑部侍郎進尚書謂大臣曰方今人

才如武仲者未見其比

周淙

字彥廣長興人父需由進士官至左中奉大夫淙幼警敏力學累官直龍圖閣除兩浙轉運副

使知臨安府所至有成績封長興縣男

周紫芝

宣城人少隱居陵陽山南兩以鄉貢赴禮部下第家貧井日而炊里人嗤之不顧嗜學益

苦年六十一始以廷對第三人出身歷右司員外郎出知興國軍為政簡靜不擾而事亦治秩滿奉祠歸入廬山終焉

周端朝

字子靜永嘉人為太學生時趙汝愚為奸臣所攻罷相端朝與同舍生楊宏中等六人上

疏救之時稱六君子終吏部侍郎

周祐

字子愛自長城徙居是邑以春秋登第沈靜寡交不事表暴恬于仕進紹興三年丞相留正葛

邨以文行薦除諸王宮教授祐
以疾力辭累使督赴闕卒不就

周勣

張浚帥福建辟勣幕官時趙鼎貶湖州道過福
唐人莫敢相顧勣獨沿檄往明州為殷家寓居

福之外邑
坐貶封州

周聿

青州人紹興間召對陳經論匡濟策稱旨累
官戶部侍郎所著有春秋文義易說等書

周隨亨

江山人舉進士紹興元年以直龍
圖閣傳宣陝蜀死於閩州亂軍

周杞

處州人建炎三年知常州值苗劉之亂杞倡義
勤王以功除右文殿修撰兄格建炎初為浙東

提刑死於陳通之亂贈龍圖
閣學士兄弟忠義名震一時

周自強

字勉仲江山人入棘寺三十餘年先是仕嶺
南者歿其妻若女不能自存咸沅落為人婢

自強奏請官為嫁之又置接濟庫計口給錢米使其子孫得出嶺南且慮不能久乃捐已俸買田三十頃開于朝刻石著其事

周敬孫

台州人太學生師事金華王柏受性理之學嘗著易象占尚書補遺春秋類例

周敦頤

字茂叔以舅龍圖閣學士鄭向恩補官調分寧主簿移桂陽令治績尤著累官至廣東轉

運判官提點刑獄以洗冤澤物為已務尋因疾求知南原軍為學不由師傅然契道體二程子從父宦遊因受學焉所著有通書太極圖說卒追封道國公諡曰元從祀孔子廟庭子燾官寶文閣侍制

周柘

星子人博雅好古淹貫經史諸子百氏之書工於詩賦後集朱文公語錄類為別集以詔後學

學者宗之

周奭

湘鄉人乾道間鄉薦同胡文定再舉不第從張南軒游南軒嘗問天與太極何如對曰天可言配太極不可言合天形體也太極性也惟聖人能盡性太極所以立南軒深以為然題其亭曰

齋飲

周端禮

字應和嘉定五年奉使金國主聞使至輒伏盜剽劫禮幣然後以使者失職啟釁端禮及境察知其意乃遣幣他邸夜果邏舟數十問宋使者何在無所得黎明募壯夫倍道至金金主弗知令判使索書幣甚丑端禮具以進金主大驚作臣僚相傾失色贈遺甚厚使還寧宗大悅

周天駿

字子美從西山真文忠游文忠稱其質性渾厚若在璞之玉書敬齋二字以遺之公持已

接人一以敬為
主其容衆如

周墳

字伯和瀛溪九世孫
世傳家學隱居獨善

周學古

字會卿行已孫兩薦漕闈卒不第遂息意場
屋以風雅自娛水心葉適序之云周會卿與

潘德久齊稱德久漫浪江湖吟號不擇地故所
至有聲會卿常閉戶讀書盤摺生語有若天設
德久甚畏之居謝池坊
窟山宅水自成深致

周堂

字良載丞相江萬里一見賞之馬廷鸞李伯玉
輩交薦署江東提刑幹辦時江淮屢警堂繕城

堡以衛捍均賦斂以儲峙咸寧甲戌登進士明
年元兵至丞相江萬里守臣唐震死之衆推堂
署降表罵且泣因遁去季宋知堂可重任起南
劍治中改廣州總管不拜後以子應極孫伯琦

貴推恩累封鄱陽郡侯皇明經博學倜儻尚氣節世以魯仲連擬之稱曰梅山先生見祠於邑學

金周昂

南和縣主簿有異政遷良鄉令真定人父伯祿大定中進士官至同知沁南軍節度使昂性孝友喜名節學術醇正文筆高雅一時名儒皆師尊之年二十四擢第累遷三司官為人所擠謫東海後召入翰林言事愈切出三司

元

周伯琦

鄱陽人父應極至大間獻皇元頌後拜集賢侍制終池州同知伯琦由國學生累官翰林直學士兵部尚書改浙西廉訪使至正間招諭張士誠降拜江浙行省左丞伯琦儀觀溫雅粹然如玉博學文章尤以篆隸真草擅名當世

周仁榮

字本心臨海人父敬孫宋太學生師事金華王柏受性理之旨嘗著易象占尚書補遺春

秋類例仁榮承其家學治易禮春秋而工為文章泰定初由處州美化書院山長召拜國子博

士累遷集賢待制弟仔肩延祐中進士累官惠州路判官

周之翰

華亭人博究羣書通象數之學其著述有乾坤闔闢天地生成陰陽變化山川流峙四圍

并贊以發明其蘊奧講授于鄉以壽終

周古象

歙水縣人元兵掠至入贅蒙古氏既生子未嘗喜妻詢其故曰有母在欲得歸省妻許之

且囑曰母在當奉養勿以妾故復來既歸母尚無恙古象奉養盡孝母歿廬墓三年妻亦終身

不嫁淮西憲僉幹克莊為立孝里門

周樂

瑞安人宋狀元坦之後父晟通經能文方國珍竊據温州拘晟置海舟上樂隨往事其父甚謹

一日賊酋遣人沈晟于水樂泣請曰我有祖母幸留父侍養請以已代父死不聽樂抱父不忍

捨遂同死

周潤

字彥德臨海人嘗學于周仁榮與達兼善為友隱居教授四十年至正中被召既沒而思

命始下鄉人相與即其所居尊稱之曰紫巖先生所著有紫巖集十餘卷

周修

字望舒謙恭循禮博通經史既冠邑令聞其賢辟為邑庠訓導修素剛直疾惡如讎值元季亂

雖名門多陷于惡逆修每移書誚讓詞語峭直賊帥黃斌見而大怒使其徒劫致之時諸生在

門者相與圖畫營解修不許曰死生命也安能屈辱於人以求活邪及擁至賊前閉目不為禮

高聲以犬虺叱之遂
過害至死罵不絕口

明

周忠

金谿人少穎悟通舉子業國初召見青龍殿奏
對稱旨寵賜優渥從征湖廣特命參謀左右後
欲大用之屢辭不就洪武初復詣闕
獻太平十六策遣使沙漠不知所終

周淵明

字孟潛壽昌人洪武中以能書薦擢中書舍
人遷工科給事中尋陞大理寺丞官至四川
布政司參議平生尚儉素
甘淡薄讀書手不釋卷

周顯

合肥人精悍有膽氣驍勇過人初充帶刀先鋒
陞帳前都先鋒又以奇功陞驍騎左衛指揮洪
武中從副將軍李文忠進兵
阿勒呼木河戰沒迎柩賜葬

周炳

舞陽人孝母焦氏至孝溫清定省無違禮母嘗
病甚炳哀慟顯天以身代母又思瘡肉炳四出

求之弗得悲痛愈切晚忽有瘴入其室
殺以陷母病遂愈事聞洪武中旌之

周顛仙

南康建昌人元末往來南昌乞食暮宿閭閻
下一日忽有異詞凡新官至必謁訴曰告太

平及國初駕至南昌顛仙拜於道左言動殊異
隨至金陵且云入火不熱試覆以巨甕積薪煨
之火滅揭視寒氣凜然嘗以手畫地成圈曰破
一桶成一桶時陳友諒據江西曰可征否曰可
果平之後辭入廬山
莫知所之有御製傳

周丹

永嘉人洪武初進士授新化縣丞在官以廉勤
門無私謁吏卒不敢欺驗民貧富及丁稅多寡

第為上中下籍記之遇有賦役隨輕重使之故
民不擾而事易集至於獄訟文牘之務皆躬理
之吏胥不得為奸罷諸役作民晏然安業由
是流民之歸者益衆滿考課最陞考功主事

周觀政

洪武中以薦教授九江擢為監察御史常監奉天門有中使將女樂入觀政止之中使曰

有命觀政曰有命亦不可中使怒而頌之出報曰可使之出觀政亦不從曰必面奉詔已而上

出謂觀政曰內間慶賀侑食之樂廢缺欲令內人肄習吾已悔之御史言極是永樂初陞江西

按察司僉事建言九事曰尊定制厚親親嚴武備覈邊情謹刑獄通下情慎朝儀惜人才明毀譽

皆見嘉納時安南初下觀政又言四事曰修明政教慎簡征科革正衣冠作新學校疏入成祖

即賜施行官至觀察使卒

周梅

孝感人洪武間以卓行見推任福建按察司僉事後致仕冰檠之操始終不渝鄉人慕之

周謨

瀏陽人博通經史為士類所推洪武中薦于朝試其材可以大任拜河南布政司左參政

周榮

洪武間河南知府遇事果斷洛陽民婦張氏失

緇線不知盜名訴于府榮密謂之曰汝但歸焚香罵府官不為我捕盜有嗔怒者即以聞張如其言不二日果有嗔者一問即伏府中稱為神明

周縉

字伯紳武昌人以太學生授永清地密通燕府縉

文皇起兵郡縣望風迎降永清地密通燕府縉拙力為拒守縣民寡弱相率逃散縉度不可為懷印南奔將地圖焉道聞母喪歸葬即出糾義旅勤王戰繼戎器數日畧具則聞南師燬而天命去矣遂去匿編氓間已而事露有司即其家械赴京師縉分必死慷慨就行至則下獄久之從輕典謫戍興州居數年以子代還年八十考終于家

周是修

名德以字行太和人少孤力學舉明經為霍邱縣學訓導入見高帝問家居何為對曰教

人子弟孝悌力田高帝喜擢周府奉祠正改衛府紀善王末之國留京師數陳論國家大計及指斥用事者眾共挫折之是修屹不為動北平師渡江宮中自焚是修留書其家別友人江仲隆解縉胡靖蕭用道楊士奇且付後事暮入應天府學自縊死年四十九是修內貞外和孝友忠信非其義不苟取襟懷坦明灑落而沖澹悠然其學自經史百氏下至陰陽醫卜靡不通究為文未嘗締思援筆立就而雍容雅善詞理條達嘗曰忠臣不以得失為憂故其言無不直烈女不以死生為慮故其行無不果

周觀

洪武末為按察使稟性剛直彈劾不避權貴在任振肅風紀百度惟新吏民畏之

周濟

字大亨洛陽人永樂甲午舉人授御史改斷事仕是安慶知府在任多忠政後以疾卒六縣之

民為之罷市巷哭執紼至洛陽者數百人

周樂

永樂中雲南按察司副使操履清介終于官一物無所遺惟存經史數帙而已官為棺殮而歸

周新

字志新廣東南海人初為郡學生有時名貢入太學選授大理寺評事以剛直著永樂二年拜

監察御史彈劾不避權要雖貴戚皆畏之人稱為冷面寒鐵公尋擢浙江按察使洗冤澤物發

奸摘伏儼若神明境中暴虎害人新為文告城隍須臾虎詣伏罪格殺之嘗巡屬縣易服色入

屬縣官收繫獄中遂知一縣疾苦由是諸郡縣聞風股慄莫敢肆其奸新處家儉朴雖貴一如

寒士一日同寮私屬內燕新之室人獨荆釵布裙若田野婦各慚慙遂更相變為澹素朝廷嘗

命錦衣千戶如浙拿賊吏千戶擅作威福索詐
賄賂新時進須知遇千戶于涿州即捕繫涿獄
千戶逸走詣闕奏新上怒縛新至闕下新猶口
口歷指陳千戶罪狀不已上愈怒命肆諸市臨
刑大呼曰生為直臣死當作直鬼是夕太史奏
文星墜上大悔不悅者久之即下千戶于獄論
死上問左右曰周新何許人對曰廣東上歎曰
廣東有此等好人自後嘗見形于朝一日忽見
一人衣紅衣立日中上呵之對曰臣周新也上
帝以臣剛直命為浙江城隍為陛下治奸臣貪
吏言已因忽不見天顏愴然
語具彭森冷面寒鐵公傳中

周文褒

永嘉人學行卓越尤善楷書永樂中登進
士第擢河南左布政惠政及人聲譽赫然

周述

吉水人永樂甲申進士第二與從弟孟簡連名
俱授翰林編修述累官左春坊庶子兼翰林侍

讀預修兩朝
實錄有文名

周忱

字恂如吉水人永樂甲申進士時選曾榮等文淵閣讀書忱自願進學上喜增忱為二十九人後擢刑部主事預修五經四書性理大全宣德中陞工部右侍郎巡撫江南督理糧儲會計有方國用充足民懷其惠官至戶部尚書卒謚文襄所述有雙崖集

周敘

吉水人永樂戊戌進士選為庶吉士官至侍讀學士署南京翰林院事雖以文字為職業尤著意國事前後章論皆剴切勤於纂修所著有詩學梯航唐詩類編

周瑛

莆田人其立志欲求見聖人之一而必欲由博以反於約於是肆力於百家羣藝事必為之所教人先於靜得必隨事窮理求其自然與其富然又會其所以然積累既多於融貫處亦自得

文章名青宮侍講尤多啟沃之功及授政務守正應變刺裁不滯屹然有古大臣風

周斌

昌黎人天順進士任監察御史以劾忠國公石亨驕恣不法出知江陰縣在任多惠政邑人立祠肖像祀之後擢守開封未幾轉陝西參政軍民老稚萬餘人遮道請留復白于提學副使劉

昌記其遺愛立石以頌德

周成

字朝美海陽人由舉人除歙縣學訓導白沙陳獻章之高弟有志于性理之學立教以孝悌為先圖冠祭二儀節於講堂之壁間朔望躬率諸生講習之諸生中年少者督集學舍肄業每夜分微行察諸生勤惰詰明行賞罰使知所勸戒終日具衣冠端坐雖盛夏不暫釋諸生見之凜然真嚴師也在任八年遷國子監助教上治安通義保泰安邊二策不報九年任滿授翰林院

檢討
致仕

周津

字文濟慈谿人以進士為御史監龍江瓦屑二權務中貴百計陷之不可得巨璫蔣琮欲納交

治具蕭寺托同僚致之及門而覺即策馬返閣老邱濬嗾人訐冢宰王恕津劾以妨賢病國舉

朝躋之擢知九江御史周進隆以瑞州盜起劫制守令宜選強明庶幹者治之奏徙津津至啟

都御史林俊宜用東漢臆盜相斬除罪法林從之盜果平在雲南治滇溢之患令鑿漢廠諸壑

復開子河以叔其勢滇流既道以至於今所著有月航集東巡稿

周洪

字廷誥上海人成化辛丑進士授蒲圻令督農種粟麥植桑麻令婦女業紡績紵絲泉驗其勤

惰而賞罰之高田製筒車下濕創坡堰民賴饒洽修學舍考校德義貧者資之鄉置社學置田

三十畝令生徒父母合力耕稼復其徑為教讀
資邑有奸法者大書木牌于其門雖權勢不避

置立義倉六所儲穀三萬石至正德初大旱民
猶被其餘澤拜監察御史蒲人傳誦迄今不忘

周庚

字原己初名京吳縣人家世業醫而庚喜讀書
工古文詞隱居養親初無仕意成化中以名醫

徵歷太醫院院判為人清慎文關
官為醫而業文不廢其詩沉闕
貌瞿然雖

善行楷然
皆不苟作

豐有奇氣尤

周季麟

字公瑞寧州人成化
士辰進士歷都御史

周倫

字伯明崑山人弘治己
未進士歷尚書謚康禧

周廣

字充之太倉人弘治乙丑進士授試御史疏論
大臣謫驛丞累陞江西按察司僉事改督學校

崇尚風節總修江西通志
累陞南京刑部右侍郎卒

周玉

字朝振臨海人弘治癸丑進士歷國子祭酒

周季鳳

字公儀寧州人弘治癸丑進士授刑部主事轉郎中擢四川副使督學雲南遭行太僕寺

卿湖廣按察左右布政使平柳寇有功陟都御史撫治保定尋掌南臺進南京刑部侍郎卒贈刑部尚書諡康惠其在湖廣最久德澤最深鑿井于會城汲福劉績銘有文于上

周用

字行之吳江人弘治乙丑進士授行人仕至太子太保吏部尚書卒諡恭肅用端明簡諒有風節不肯依附人人亦不敢干以法

周冕

寧波人司諫春坊永樂中以官寮罹罪下獄死

周期雍

字汝和寧州人正德
戊辰進士歷尚書

周煦

字磐和安福人正德
辛巳進士歷都御史

周祚

字天保山陰人正德辛巳進士歷官諫議以疾
歸隱居前梅山中肆志為文辭其詩賦有渾龐

沈鬱之風瑰
奇激巖之氣

周金

字子庚號約菴武進人正德戊辰進士歷官
中丞至南京戶部尚書素有時名謚襄敏

周禕

字天吉山陰人嘉靖
丙戌進士歷都御史

周鈇

字次人嘉靖間進士任監察御史杜奸弊出
禁巨璫斂服出按陝西規畫遺備允協時宜濟

通惠渠民賴焉後改宮僚以陳言違事遠誦復
起國子監丞遷吏部主事嚴然涉絕請託薦紳

畏其節以抗疏出判河間竟落職家
居不通官府出閭巷徒行如布衣

周延

字南喬吉水人嘉靖癸未進士知潛江縣清介
剛毅言笑不苟人不敢犯亦不干以私好善嫉

惡出于天性政令所布吏畏民懷後為給事中
以言事外謫歷官刑部尚書左都御史當分宜

執政時掌院如秋霜烈日
風紀肅然謚簡肅

周大禮

崑山人嘉靖十七年由進士以刑部主事言
事謫鄧州同知庶明剛直當事不避時值聖

駕幸承天公當協濟新野處置得宜不畏
強禦州縣一時甚蒙其庇終河南參政

周采

字子亮寧海人嘉靖
壬辰進士歷都御史

周滿

字謙之漢州人嘉靖
壬辰進士歷都御史

周倣

字初卿成都人嘉靖辛丑進士歷應天府尹

周怡

字順之太平人嘉靖戊戌進士任給事中以言事忤旨逮獄放歸二十餘年隆慶初起歷國子

司業兼太常少卿告歸卒

周如斗

字允文餘姚人嘉靖丁未進士任御史巡按蘇松有惠政禦倭寇民尸祝之歷巡撫都御

史

周尚文

字彥章陝西西安衛人襲指揮嘉靖中累功太保兼太子太傅後軍都督府左都督卒隆

慶元年贈太保謚武襄

萬姓統譜卷六十一